

MANEN PA EN WANPORON MATÄUJ.

¹ PUK en di kan, me Iejuj Krijtuj, me japwilim en Dawid, me japwilim en Apraam, tapi jan ia. ² Apraam me wiadar Ijaak, a Ijaak me wiadar Iakop, a Iakop me wiadar Iuda o ri a ol akan; ³ A Iuda me wiadar Parej i Jara ren Tamar; a Parej me wiadar Ejrom, a Ejrom me wiadar Aram; ⁴ A Aram me wiadar Aminadap, a Aminadap me wiadar Naajon, a Naajon me wiadar Jalmon; ⁵ A Jalmon me wiadar Poaj ren Raap, a Poaj me wiadar Oped ren Rud, a Oped me wiadar Ieje; ⁶ A Ieje me wiadar nanmarki Dawid, a Dawid me wiadar Jalomo ren li odi en Uriaj; ⁷ A Jalomo me wiadar Reapeam, a Reapeam me wiadar Apia, a Apia me wiadar Aja; ⁸ A Aja me wiadar Iojapat, a Iojapat me wiadar Ioram, a Ioram me wiadar Ujia; ⁹ A Ujia me wiadar Iotam, a lotam me wiadar Aaj, a Aaj me wiadar Ijkia; ¹⁰ A Ijkia me wiadar Manaje, a Manaje me wiadar Amon, a Amon me wiadar Iojia; ¹¹ A lojia me wiadar Iekonia o ri a ol akan ni anjaun arail jalilan Papilon. ¹² Murin arail jalidi nan Papilon Iekonia me wiadar Jealtiel, a Jealtiel me wiadar Jerupapel; ¹³ A Jerupapel me wiadar Apiud, a Apiud me wiadar Eliakim, a Eliakim me wiadar Ajor; ¹⁴ A Ajor me wiadar Jadok, a Jadok me wiadar Akim, a Akim me wiadar Eliud; ¹⁵ A Eliud me wiadar Eliajer, a Eliajer me wiadar Matan, a Matan me wiadar Iakop; ¹⁶ A Iakop me wiadar

Iojep, me likondeki Maria, me kaipwiedi Iejuj, me maraneki Krijtuj. ¹⁷ Di karoj jan ren Apraam lei Dawid me eijokpaieu; a jan Dawid lei arail jalidi nan Papilon di eijokpaieu; a jan arail jalidi nan Papilon lei Krijtuj di eijokpaieu. ¹⁸ Nan iet duen Krijtuj a kotin ipwidier: Ni anjau me in a Maria kijin nin on Iojep, a diarokadar, me a lijeaneckier Nen jaraui mon ara tu pena. ¹⁹ A a warok Iojep ol pun amen, ap jota men kanamenokala i, ap kupukupura, en rir muei jan i. ²⁰ A ni a kotin madamadaue duen mepukat, kilan, tounlan en Kaun o pwara don i ni a aliman majani: Iojep nain Dawid koe, der majak, en ale om warok Maria, pwe Nen jaraui me a lijean kidar. ²¹ A pan kaipwiedi jeri ol amen, me koe pan ki on mar a Iejuj, pwe a pan dorela japwilim a aramaj akan jan nin dip arail. ²² Mepukat karoj wiauier, pwen pwaida me lokido jan Kaun ren jaukop o, me majani: ²³ Kilan jeripein makelekel o pan lijeanda, ap kaipwiedi jeri ol amen, irail ari pan ki on mar a Imanuel; iet wewe: Kot me kotin ieian kitail. ²⁴ Iojep lao pirida jan a jaimok, ap kapwaiadar, me tounlan en Kaun o kotin kakalik on i o apapwali a likond. ²⁵ A ap jota pweidi re a, lao a kaipwiedier japwilim a mejeni ol, ap kotiki on mar a Iejuj.

2

¹ A IEJUJ lao ipwidier Petleem nan Iudää ni muein nanmarki Erodej, kilan ol lolekon kai ap pwarado jan ni maj en Ian ko don Ierujalem, kalelapok: ² Ia Nanmarki en Juj akan, me apton ipwidier, kotikot ia? Pwe je kilaner a uju ni jap en maj en lan ap pwarado, pwen poni i. ³ A

nanmarki Erodej lao ronadar mepukat, ap landar o toun Ierujalem karoj,⁴ Ap kupokon pena jamero lapalap karoj o jounkawewe en aramaj akan kainoma re 'rail, wasa Krijtuj pan ipwidi ia.⁵ Irail ari potoan *on* i: Nan Petleem en Iudää; pwe iduen a intinidi ren jaukop o:⁶ A koe Petleem, jap en Iuda, kaidin me tikitik nan *pun* en jaupeidi en Iuda kan; pwe Kaun amen pan tapi *jan* uk, me pan kaunda nai aramaj en Ijrael akan.⁷ Erodej ap kawai pena ol lolekón kan, kalelapok mau re 'rail anjau o, me uju o pwarado.⁸ I ari porone ir alan Petleem majani: Komail kowei raparapaki mau jeri o; a komail lao diaradar, en kaireki *don* ia, pwe i en pil kola *poni* i.⁹ Irail lao roner nanmarki o ap koieila. A kilan uju o, me irail kilaner nan jap en maj en *lan*, ti *on* mo 'rail, a lao udi *on* waja o, me jeri pwelel kotikot ia.¹⁰ Irail lao kilaner uju o, re ap peren kida kaualapia.¹¹ Irail lao pedelon *on* nan im o, re ap majanier jeri pwelel o in a Maria, re ap kaipokedi o *poni* i, o kapwaredar arail kapwa kan, ap maironki *on* i kold, o men pomau, o mire.¹² Kot ap kotin panoki *on* irail ni arail auramen, en der purelan Erodej, re ap weidwei ni apot al purelan jap arail.¹³ Irail lao jamalar, kilan tounlan en Kaun amen ap pwara *don* ren Iojep ni a aliman majani: Paurida, ale jeri pwelel en o in a tanwei *lan* Äkipten o kaukaujon waja o, I lao kaire kin uk, pwe Erodej pan rapaki jeri pwelel o pwen kamatala.¹⁴ I ari kipada, aleer jeri pwelel o in a ni *pon*, kotilan Äkipten;¹⁵ O kaukaujon ia, lao en Erodej a matala, pwen pwaida, me lokido *jan* Kaun o, ren jaukop o me majani: *Jan* nan

Äkipten me I ekeredo nai ol o. ¹⁶ Erodej lao manier, me a jarokidier ol lolekon kan, ap onion kidar kaualap o poronelan, kamela jeri ol karoj, me mi Petleem o nan jap jalon karoj, me jaunpar riau o tikitik jan, duen anjau me a kalelapok mau ren me lolekon kan. ¹⁷ I dokan a pwaidar me lokido ren jaukop Ieremia me majani: ¹⁸ Nil eu wiauier nan Rama, janejan o maiei laud; Rael janejanki na jeri kan, a kan injenemaula, pwe irail joer mia. ¹⁹ A Erodej lao matalar, kilan tounlan en Kaun amen ap pwara don ren Iojep nan Äkipten ni a aliman, ²⁰ Majani: Paurida ale jeri pwelel en o in a, ko won nan jap en Ijrael, pwe irail melar, me rapaki, pwen kamela jeri pwelel o. ²¹ I ari kipadar, ale jeri pwelel o in a, pure don jap en Ijrael. ²² A lao mani, me Arkelauj kaunda Iudää wiliandi jam a Erodej, ap lan kotilan waja o. Kot ap kotin panoki on i ni a aliman, ap kotilan jap en Kalilää kai. ²³ O kotido kotikot nan kanim eu me adaneki Najaret, pwen pwaida, me lokido ren jaukop akan: A pan maraneki men Najaret.

3

¹ A NI ran pukat Ioanej jaunpaptaij pwarado, padapadak nan jap en Iudää, ² Majani: Komail kalula, pwe wein nanlan korendor. ³ Pwe iei i, me jaukop Iejaia katitiki, majani: Nil en jaunkair amen nan jap tan: Komail kaonopada al en Kaun o, kainenela al a! ⁴ A i Ioanej me a likau wun en kamel o a pirapireki kil in man, a jak a manjiiek o oni en nan wel. ⁵ Toun Ierujalem, o toun Iudää, o toun jap akan liman Iordan ap koieila re a; ⁶ O

irail paptaijela re a nan Iordan, ni ar weokada dip arail akan. ⁷ A lao majanier Parijär o Jadujar me toto ko don a paptaij, ap majani on irail: Dakot wan oter komail! Ij me padaki on komailer, en piti jan ni kamekam me kokodo? ⁸ Ari, komail kapwareda wan kalula mau! ⁹ A komail depa lamelame, me komail pan indan pein komail: Nan Apraam jam atail. Pwe i indai on komail, me Kot kotin kak on wiaki on Apraam na jeri kai takai pukat. ¹⁰ Jile o mier ni tapin tuka kan; a tuka karoj me jo wa mau, pan paledi o lokidokila nani iai. ¹¹ Melel, i paptaij kin komail pil on kalula, a me kotido muri, nan me laude jan ia, nai jowar on, en wa japwilim a jut; i me pan paptaij kin komail Nen jaraui o kijiniai. ¹² Japwilim a tanir mi ni lim a; a pan kotin koko melel japwilim a pera, ap nekid pena japwilim a wan korn nan im en nak, a dip akan a pan kotin karon kila kijiniai joutuk. ¹³ Iejuj ap kotido jan Kalilää, koti don Iordan ren Ioanej, pwen paptaijela re a. ¹⁴ A Ioanej kotin kan, ap potoan on: Mak eta i en paptaijela re ir, a iaduen ir me kotido re i? ¹⁵ A Iejuj kotin jaben majani on i: Wiada maj, pwe me kon on kita, en kapwuiada pun kan karoj; a ap duki on i. ¹⁶ Iejuj lao paptaijelar, ap kotin madanada jan nan pil o. A kilan, nanlan ap ritidan i, i ari kotin majani Nen en Kot kotidido ni mom en muroi men a kaipokedi po a. ¹⁷ O kilan, nil eu jan nanlan majani: Iet nai ol kompok, me I kin polaule kida!

4

¹ IEJUJ ap kotin kakaluadala ren Nen nan jab tan, pwen jonejon ren tewil. ² A lao kotin kaijejolar

ran panaul o pon panaul ap men jak. ³ Men kajonejon ap pwara don i indada: Ma komui Japwilim en Kot, en majani, takai pukat en wiala prot. ⁴ A kotin jaben majani: A intinidier: Kaidin prot eta, me aramaj kin memaureki, pwe majan akan karoj, me kin pwili jan nin jilan in Kot. ⁵ Tewil ap kalualan i nan kanim jaraui o kauada i pon konkon en kaudok, ⁶ Indan i: Ma komui Japwilim en Kot, kajedi pein komui, pwe a intinidier: A pan kajilaki japwilim a tounlan kan komui, o irail pan wa komui ni lim ar akan, pwe aluwilu omui ede dipikelekel ni takai eu. ⁷ Iejuj kotin majani on i: A pil intinidier: Koe der kajonejon Kot om Kaun. ⁸ Tewil ap pil kaluadalan i pon nana ileile kaualapia eu o kajale on i wein jappa karoj o a linan, ⁹ Indan i: Mepukat karoj i pan ki on komui, ma komui men poridi o poni on ia. ¹⁰ Iejuj ap kotin majani on i: Ko jan ia Jatan, pwe a intinidier: Koe en poni on Kot om Kaun, i eta koe en papa. ¹¹ Tewil ap muei jan i, a kilan, tounlan kan ap pwarado papa on i. ¹² A lao manier, me Ioanej jalistier, ap kotilan Kalilää, ¹³ O a kotin muei jan Najaret, kotido kaukaujonla Kapernaum, me mi ni kailan jed impan jap Jepulon o Naptalim; ¹⁴ Pwen pwaida, me lokido ren jaukop Iejaja me majani: ¹⁵ Jap Jepulon o jap Naptalim, me jal on jed, palilan Iordan, o Kalilää en men liki kan, ¹⁶ Aramaj akan, me momod nan rotorot, kilaner marain lapalap eu, o irail me momod nan jap en mot en mela, marain eu dakar irail adar. ¹⁷ I dokan Iejuj kotin tapiadar padapadak o mamajani: Kalula, pwe wein nanlan korendor. ¹⁸ A lao kotikot jili

pon oror en lein Kalilää, ap majanier pirien eu, Jimon, me adaneki Petruj, o ri a Andreaj, me kadukaduedi ara uk nan jed, pwe ira me jaujed. ¹⁹ A ap kotin majani on ira: Idauen ia do, I pan wia kin koma jaujed en aramaj! ²⁰ Ira madan muei jan uk akan o idauenla i. ²¹ A ni a kotila jan waja o, ap pil majani eu pirien, Iakopuj, nain Jepedäuj o ri a Ioanej, me mi nin jop ren jam ara Jepedäuj, wonewone ara uk akan. I ari kotin molipe ira do. ²² Ira madan muei jan jop o jam ara ap idauenla i. ²³ Iejuj ari kotin kakan jili nan Kalilää kaukawewe nan arail jinakoke kan o padapadak ronamau en wei, o kotin kakelada jon en jomau o luet akan karoj nan pun en aramaj akan. ²⁴ I ari indant jili nan Jirien pon. O irail wa don i me jomau kan karoj, me aneki jon en jomau o wairok kai, o me tewil ti poa kan, o me pwepwe kan, o me rerer akan, i ari kotin kakela ir ada. ²⁵ Pokon kalaimun me idauenla i jan Kalilää o Dekapolij, o Ierujalem, o Iudää, o jan palilan Iordan.

5

¹ A LAO majani pokon o, ap kotida pon dol eu; a lao kaipokedi, japwilim a tounpadak kan ap kai don i. ² I ari kotin dauaja pajan jilan i kawewe on irail majani: ³ Meid pai, me jamama ni nen ir, pwe nairail wein nanlan. ⁴ Meid pai, me mauk, pwe re pan kamaitala. ⁵ Meid pai, me opampap, pwe re pan jojoki jappa. ⁶ Meid pai, me kin men mana o men nim me pun, pwe re pan medila. ⁷ Meid pai, me kadek, pwe re pan diar kadek. ⁸ Meid pai, me nan monion arail makelekel, pwe re pan ariri Kot. ⁹ Meid pai, me kin tom pena, pwe re pan adaneki

jeri en Kot. ¹⁰ Meid pai, me kamekameki pun, pwe nairail wein nanlan. ¹¹ Komail meid pai, ma irail lalaue o paki komail o palian komail ni arail lokaia jued o likam pweki *nai*. ¹² Komail injenemau o perenda kaualap; pweki katine pamail me lapalap nanlan. Pwe iduen irail paki jaukop oko, me mo 'mail. ¹³ Jol pan jappa komail. A ma jol jara jan, da me a pan joleki? Nan a pan me mal kot, men lokidokila, o aramaj en tiak pajan. ¹⁴ Marain pan jappa komail, Kanim eu, me mi pon dol eu, iota kak rirla. ¹⁵ Aramaj pil iota kin ijikeda lamp eu, ap ki on pan kajak, pwe pon deu a, o a kin kamaraini toun im karoj. ¹⁶ Iduen omail marain en janjal mon aramaj, pwe irail en udial omail wiawia man kan, ap kapikapina Jam omail, me kotiluit nanlan. ¹⁷ Eder kikion me I kodon, tiakedi kapun de jaukop akan. I iota kodon tiakedi, a pwen kapwaiada. ¹⁸ Pwe melel, I indai on komail, lao lan o jappa pan poula, iota eu de kijin muai en kapun eu pan lokidokila, lao karoj pan pwaida. ¹⁹ Ari, meamen me tiakedi eu kijin kujoned tikitik pukat, ap pil padaki on aramaj, ren tiakedi, nan a pan tikitik nan wein nanlan. A meamen, me oke o padaki on aramaj, ren oke, i me pan lapalap nan wein nanlan. ²⁰ Pwe I indai on komail, ma omail pun jo man jan pun en jaunkawewe o Parijär, akan, komail iota pan kak pedelon on nan wein nanlan. ²¹ Komail ronadar, me a loki, on men kaua: Koe der kamela aramaj! A me pan kamela aramaj, pan panalan kadeik o. ²² A I indai on komail, meamen makarada mal pan ri a ol, pan panalan kadeik. A me pan indan ri a ol: Raka, pan panalan kapun.

A me pan inda: Koe me pweipwei, pan lokidokila nan le en pweleko. ²³ Ari, ma koe wa don pei jaraui om mairon, ap tamanda waja o, me ri om ol injenjued pa om. ²⁴ Pwilikidi maj om mairon impan pei jaraui, ap kola kadeke ri om ol, ap kodo kapwaiada om mairon. ²⁵ Madan materoki *on* me palian *on* uk ni om ian *i* pon al o, pwe me palian *on* uk ender *panalan* uk ren jaunkapun, a jaunkapun *panalan* uk ren papa o, o koe pan lokidokila nan imaten. ²⁶ Melel I indai *on* uk, koe jota pan ko jan waja o, koe lao kapunala lua karoj. ²⁷ Komail ronadar, me a lokido: Koe der kamal! ²⁸ A I indai *on* komail, meamen *ninar* li amen, pwen norok, nan a kamal *on* i nan monion *i*. ²⁹ O ma pali maun en maj om kamakar uk, waikada jan *o* kaje jan uk, pwe a mau *on* uk, kijan war om en ola, jan war om pon en lokidokila nan pweleko. ³⁰ O ma pali maun en pa om kamakar uk, waika jan *o* kaje jan uk, pwe a mau *on* uk, kijan war om en ola, jan war om pon en lokidokila nan pweleko. ³¹ A pil lokido: Meamen me pan kajela a paud, i en ki *on* i kijin likau en kamueit. ³² A I indai *on* komail, meamen me pan kajela a paud, me jo nenek nan a kin kamal eki *i*; a meamen, me paudeki me lokido kilar, nan *i* me kamal. ³³ Komail pil ronadar, me a loki *on* men kaua: Koe der kaula likam; a koe kapwaiada om kaula *on* Kaun *o*! ³⁴ I indai *on* komail, der man kaula! Der kaukila nanlan, pwe mol en Kot; ³⁵ Pil der jappa, pwe utipa; pil der Ierujalem, pweki kanim en Nanmarki lapalap. ³⁶ Koe pil der kaukila mon om, pwe koe jota kak *on* wiada pit en mona eu, en puetepuet de tontol. ³⁷ Omail kajokajoi pena en: Ei ei; jo, jo; pwe me

dauli mepukat, kin tapi jan ni me jue. ³⁸ Komail ronadar, me a lokido: Por en maj en depukki por en maj; o *ni* pot en depukki *ni* pot. ³⁹ A I indai *on* komail, komail der palian me jue. A meamen pikir uk ni pali maun en likin jap om, pil ki *on* i pali teio. ⁴⁰ O meamen, me men wa uk ala ni kapun, pwen adia jan om jakit, en pil ki *on* i om likau pup. ⁴¹ O ma meamen *nidinid* kin uk, en ian i mail eu, koe en ian mail riau. ⁴² Kijakijai *on* me kin *nidinid* re om, o koe der jaupei jan me poekipoeki re om! ⁴³ Komail ronadar, me a lokidor: Koe en pok *on* men imp om ap kailonki om imwintiti! ⁴⁴ A I indai *on* komail, pok *on* omail imwintiti kan. o kapakap kin irail, me paki komail; ⁴⁵ Pwe komail en japwilim en Jam omail, me kotikot nanlan. Pwe a kin kapwareda japwilim a katipin pon me jue o me mau kan, o kotin kamoredi katau pon me pun o me japon kan. ⁴⁶ Pwe ma komail pok *on*, me kin pok *on* komail, da me pan katin pa 'mail? Jaunopwei jota kin wia due met? ⁴⁷ O ma komail ranamau *on* ri omail akan, da me komail jikiki jan me tei kan? Men liki kan jota kin wia due met? ⁴⁸ Komail ari en unjokela dueta Jam omail, me kotikot nanlan, a unjok.

6

¹ KOMAIL kalaka, pwe komail der kijakij janjal mon aramaj, pwe ren udial; pwe ede jota pwain omail ren Jam omail, me kotikot nanlan. ² Ari, koe lao kijakij, ede peuk jaui mo om, duen me malaun akan kin wia nan jinakoke kan o nani al akan, pwe ren indand ren aramaj. Melel I indai *on* komail, re aleer arail pwain. ³ A koe lao kijakij, der kajale *on*

pali main om, me pali maun om kin wiada. ⁴ Pwe om kijakij en rir; a Jam om, me kin majani waja rir, pan kotin katini uk. ⁵ Koe lao wia kapakap, koe der raj on me malaun akan, pwe re men kapakap nan jinakoke kan, o nani al akan, pwe ren janjal mon aramaj. Melel I indai on komail, re aleer arail pwain. ⁶ A koe lao wia kapakap, ko on nan om pera, a koe lao ritinidier wanim o, ap kapakap on Jam om, me kotikot waja rir, a Jam om, me kin majani waja rir, pan kotin katini uk. ⁷ Komail lao kapakap, komail depa purepur on lokaia mal, duen men liki kan, pwe re kiki on, me re pan pwaikida ar lokaia toto. ⁸ Komail ari ender dueta irail, pwe Jam omail kotin mani meakan, me mau on komail, mon omail poeki re a. ⁹ A iet duen omail pan wia kapakap: Jam at, me kotikot nanlan. Mar omui en jaraui. ¹⁰ Wei omui en pwaida. Kupur omui en wiaui jappa dueta nanlan. ¹¹ Kotikido ran wet at tunol kaukaule. ¹² Lapwa jan kit dip at, dueta kit me kin lapwada koroj, me wia dipi on kit. ¹³ Eder kaluan kit ren me katikatiamau kan, a nekid kit jan ni me jued akan, ¹⁴ Pwe ma komail pan makeki on aramaj dip ar akan, Jam omail nanlan pan pil makeki on komail. ¹⁵ A ma komail jota pan makeki on aramaj dip ar akan, nan Jam omail jota pil pan makeki on komail dip omail akan. ¹⁶ Komail lao kaijejol, eder maj en jan duen me malaun akan, pwe re kin kawukila maj arail, pwe aramas en kilan arail kaijejol. Melel I indai on komail, re aleer arail pwain. ¹⁷ A koe lao kaijejol, ujor mon om o opinok. ¹⁸ Pwe koe dor kajale on aramaj om kaijejol, a on Jam om, mi kotikot waja

rir, a Jam om, me kin majani nan waja rir, pan
 kotin katini uk. ¹⁹ Komail der ki pena omail pai
 kan nin jappa, waja man en mot o mir pan kawela
 ia, o men pirap kin weirada o pirapala. ²⁰ A komail
 ki pena omail pai kan nanlan, waja man en mot de
 mir jota pan kawela, o men pirap jota kin weirada
 de pirapala. ²¹ Pwe waja om pai mia ia, iei waja
 monion om kin pil mia ia. ²² Por en maj iei marain
 en pali war. Ari, ma maj om makelekel, war om
 karoj pan dir en marain; ²³ A ma maj om me juev,
 war om karoj pan dir en rotorot. A ma marain,
 me mi lol om, pan rotorot, daduen wan rotorot!
²⁴ Jota amen me pan kak papa jaumaj riamen,
 pwe a pan kailonki amen, ap pok on me teio, de
 a pan kajampwaleki amen, ap mamaleki me teio.
 Komail jota pan kak papa Kot o mamon. ²⁵ I me I
 indaiki on komail: Eder nononki on maur omail,
 me komail pan kan o me komail pan nim, pil jota
 on war omail, me komail pan likau kida. Pwe
 maur jo kajampwal jan kijin mana, o pali war jan
 likau? ²⁶ Kalelapok on manpir pan lan; re jote, kin
 kamoredi, re join kin dolun, re jota kin nak pena;
 ari jo, Jam omail nanlan kotin kamakamana irail;
 a ia duen, komail jo kajampwal jan irail? ²⁷ A ij nan
 pun omail, ni a nonki, me pan kak uje pajan pein i
 ki tipon en pa eu? ²⁸ O menda komail nonki likau?
 Kalelapok on kiop akan, me mi nan jap, duen ar
 kakairida. Re jota kin dodok o jota monkol pena.
²⁹ A I indai on komail: Nan Jalomo ni a linan karoj
 jota a likau dueta apot irail. ³⁰ Ari, ma iduen Kot
 kotin kapwataki dip, me mi nan jap, me kin mi
 ran wet, a lakap pan lokidokila nan kijiniai, dadue

a jota pan kotin kalikauwi komail da, me pojona tikitik? ³¹ I me komail der nononki moinda: Da me je pan kan? De da me je pan nim? De da me je pan likau kida? ³² Pwe mepukat men liki kan kin raparapaki; pwe Jam omail nanlan kotin mani, me mepukat karoj mau on komail. ³³ Rapaki maj wein Kot o a pun, a mepukat karoj pan poujelan komail. ³⁴ Eder nonki on lakap; pwe lakap pan nonki on pein i; a itar on ran eu pein a jueed.

7

¹ DER kadeikada, pwe komail der pakadeikada. ² Pwe duen kadeik, me komail kadeikekida aramaj, iduen komail pan pakadeikada, o duen men *jon*, me komail kin *jonki*, iduen a pil pan *jon* on komail, ³ A menda koe kilikilan diper ni maj en ri om ol, a jota kan ataut o ni maj om? ⁴ De iaduen koe pan *indan* ri om ol: Aui maj, i pan ki jan diper ni maj om. A kilan, ataut apot mi ni pein maj om? ⁵ Malaun amen koe, ki jan maj ataut ni maj om, koe ap pan kak kilan, duen om pan kak ki jan diper ni maj en ri om ol, ⁶ Komail der ki on kidi me jaraui kot! O omail pai kan der kajedi on mon pwik kan, pwe ren de tiak pajan, ap jaupeido *nalij* komail pajan. ⁷ Poeki, a komail pan tunole; rapaki, a komail pan diarada; letelet, a a pan ritida mo omail. ⁸ Pwe karoj, me poekipoeki, kin tunole; o me kin raparapaki, kin diarada; o me kin letelet, nan a pan ritida mo a. ⁹ De ij aramaj nan *pun* omail, ma na putak pan poeki kijin prot, pan ki on i takai eu? ¹⁰ De ma a poeki mam amen, pan ki on i jerpent amen? ¹¹ Ari, ma komail me *jon* jueed, ap aja, ki on noumail jeri kan

kijakij mau, melel kaualap Jam omail, me kotikot nanlan, pan kotiki *on*, me poeki re a me mau kan.

¹² Ari meakaroj, me komail men, aramaj en wiai *on* komail, i me komail en wiai *on* irail, pwe iei kapun o jaukop akan, ¹³ Pedelon *on* nan wanim tätik! Pwe wanim me walek o al me tälap, me kodilan mela, o irail me toto, me kin pedelon *on* waja o. ¹⁴ A wanim me watikitik, o al me tätik, me ko *on* maur o irail me malaulau, me kin diarada.

¹⁵ Komail kalaka jaukop likam akan, me kin pwara don komail ni likau en jip, a lole irail jon en kidi komad. ¹⁶ Komail pan aja kin irail ni arail wa. Pwe da, aramaj pan kak dolun jan wain ni karer, de pik jan ni tuka kamadak? ¹⁷ Nan iduen tuka mau karoj kin wa mau, a tuka jueed kin wa jueed.

¹⁸ Tuka mau jota kak wa jueed, o tuka jueed jota kak wa mau. ¹⁹ Ari tuka karoj, me jo wa mau pan paledi o lokidokila nuni iai. ²⁰ Ari, komail pan aja kin irail ni arail wa. ²¹ Kaidin karoj, me kin kajokajoi *on* ia: Main, Main, pan pedelon *on* nan wein nanlan, a me kin wiawia kupur en Jam ai, me kotikot nanlan. ²² Me toto pan kajoi *on* ia ni ran o: Main, Main, kit jo kokopadar ni mar omiu, o ni mar omui kaujaki tewil akan, o ni mar omui wia kidar manaman toto? ²³ I ap pan indai *on* irail: I jota mail aja komail, kowei jan ia, komail me kin wiada me jueed. ²⁴ A meumen ronada ai padak pukut ap peiki *on*, I pan karajai *on* i ol lolokon amen, me kauada im a pon paip, ²⁵ Katau lao moredi, o lakape pwilipwiledo, o an me iripoki don im o, a jota ronki pajan, pweki a kakauda pon paip. ²⁶ O meamen ronada ai padak pukat, ap jota

kapwaiada, nan a pan rajon ol pweipwei men, me kauada im a pon pik en oror. ²⁷ Katau lao moredi o lapake pwilipwilido, o an ma irepoki don im o, a ronki pajan; o a ronk laud melel, ²⁸ Kadekadeo Iejuj lao kaimwijokela majan pukat, pokon o ap puriamuiki kaualap japwilim a padak o. ²⁹ Pwe a kotin kawewe on irail ni manaman, a iota dueta arail jaunkawewe kan.

8

¹ A LAO kotido jan nin dol o, pokon kalaimun idauendo i. ² A kilan, ol tuketuk amen ap kodo poni i indada: Main, ma re kotin kupura, re pan kak on kamakele ia da. ³ I ari kotin kapawei lim a, jair i, majani: I men, koe en makelekel; ari, a tuketuk ap madan modi jan. ⁴ Iejuj ap kotin majani on i: Kalaka, koe de kaireki amen; a kola kajale on jamero pein uk, o kida mairon eu, me Mojéj majani, pwen kadede on irail. ⁵ A lao kotilon on nan Kapernaum, jenturion amen apedon i poeki re a. ⁶ Indada: Main, ai ladu wonon nan deu a jomau kokon madak ap wairok kaualap. ⁷ Iejuj ap kotin majani on i: I pan kola kakelailada i. ⁸ Jenturion jaben potoan on: Main, i jowar ren kotilon on nan im ai; a ren majani eta, ai ladu up pan kelailada, ⁹ Pwe aramaj amen nai, me mi pan mana en kaun akan, ap kaunda jaunpei kai. A ma i pan indan amen: Kowi, a pan kola, o on amen: Kodo, a pan kodo, o on ai ladu: Wiada met, a pan wiada. ¹⁰ Iejuj lao mani mepukat, ap kotin puriamuiki, majani on irail me idauendo: Melel I indai on komail, jon en pojon wet I jo diaradar, iota nan Ijrael. ¹¹ A I indai on komail, me toto pan

kodo jan maj en lan, o kapin lan, ian Apraam, o Ijaak, o Iakop ni tepel nan wein nanlan. ¹² A me pweledan wei pan lokidokila nan rotorot liki, iei wajan maiei o teterok. ¹³ Iejuj ap kotin majani on Jenturion o: U kowei, a pan wiaui on uk duen om pojon. A ladu o ap kelailadar ni auer ota. ¹⁴ Iejuj lao kotilon on nan im en Petruj, ap majani, me jaulap a wonon jomau karakar. ¹⁵ I ari kotin jair pa a, a karakar ap ko jan. I ari pauridar papa i. ¹⁶ A lao jautik penaer re wa don i me toto, me tewil oko ti poa. I ari kotin kaujeki jan nen akan a majan o kakelada me jomau kan karoj. ¹⁷ Pwen pwaida, me lokido ren jaukop Iejaia, me majani: A kotin ale on pein i atail luet akan, o wa atail jomau kan. ¹⁸ Iejuj lao kotin majani aramaj toto pokon don i, ap kotin majani, ren kotela palio palilan jed o. ¹⁹ Jaunkawewe men ap pwara do potoan on i: Jaunpadak i pan idedauen ir waja karoj re pan kotila ia. ²⁰ Iejuj kotin majani on i: Pokj akan por arail mia, o manpir en pan lan paj arail mia, a Nain aramaj jota wajan kaulawei mon a. ²¹ O amen jan nan pun en japwilim a tounpadak kan potoan on i: Main re kotin mueid on ia en kola maj jarepedi ai papa. ²² A Iejuj kotin majani on i: Idauen ia do! Me melar akan en jarepedi pein ar melar akan. ²³ A lao kotida pon jop o, japwilim a tounpadak kan idauenla i. ²⁴ A kilan, ap onionidar nan jed, iluk kan ari kadupaledi jop o, a i kotin jaimokelar. ²⁵ Japwilim a tounpadak kan ap kai don i, kaupada i, potoan on: Main, re kotin dore kit ala, kit pan mela! ²⁶ A ap kotin majani on irail: Komail me pojon tikitik, da me komail majak ki? I ari kotin

kipadar majani on an o jed, ap molelar kaualap. ²⁷ Aramaj akan puriamuiki indada: Daduen men et, me an o jed kin peiki on? ²⁸ A lao kotin lei on palio nan jap en men Kerkajin, ol riamen, me tewil oko ti poa, ap tu on i; ira kodado jan nan joujou kai, me makar kaualap, o jota me kak weid waja o. ²⁹ A kilan, ira weriwer indada: Iejuj Japwilim en Kot, da me kit en wia re omui? Kom kotido kame kit mon anjau o leler? ³⁰ A pwin pwik kalaimun mi kaila wei manamana jili. ³¹ Tewil oko ap poeki re a indada: Ma kom pan kauje kit ala, ap mueid on kit, en tilon nan pwin pwik o. ³² I ari kotin majani on irail: U ko on! Irail keredi jan, rap tilon nan pwin pwik o. A kilan, pwin pwik o tandaui, tanedi on waja ukedi nan jed, irail ari mopedlar nan pil o. ³³ Jilepa kan ap tandaui tanlon on kanim o kakaireki meakaroj, duen me wiaui on me tewil ti poa ko. ³⁴ A kilan, toun kanim koiei jan pokon don Iejuj. Irail lao kilaner i, rap poeki, a en kotila jan jap arail.

9

¹ I ARI kotida pon jop o, kotela pur on japwilim a kanim. ² A kilan, re wa don i me jomau kokon madak, me wonon pon pet. Iejuj lao kotin majani ar pojona, ap majani on me jomau kokon madak: Nai, kaporopor mau, dip om akan me lapwadar. ³ A kilan, jaunkawewe kai monemoneloleki: Lap o kin lalaue. ⁴ A Iejuj lao mani arail lamelam, ap kotin, majani: Menda komail lamelam jueud nan monion omail? ⁵ Pwe ia me monai ren inda: Dip om akan lapwadar! De inda: Uda aluwei? ⁶ A pwe komail en aja, me Nain aramaj me manaman on

lapwada dip nin jappa iei me a kotin majanieki on me jomau kokon madak: Uda, ale ki om ko on deu om! ⁷ I ari udar, koieilar deu a. ⁸ Pokon lao kilaner mepukat, rap malamalaauak kila kapina Kot, me kotiki on aramaj manaman due met. ⁹ Iejuj lao kотиwei jan waja o, ap majani aramaj amen, me ad a Matäuj, me momod nan deun nopwei, ap kotin majani on i: Idauen ia do! I ari uda idauenla i. ¹⁰ Kadekadeo a lao kaipokedi konot nan im o, kilan jaunopwei o me dipan me toto ian Iejuj o japwilim a tounpadak kan konokonot. ¹¹ Parijär akan lao kilaner met, ap indan japwilim a tounpadak kan: Da me omail Jaunpadak ianki jaunopwei o me dipan akan konokonot? ¹² Iejuj lao mani mepukat, ap kotin majani: Me kelail akan jota mau on jaunwini, pwe me jomau eta. ¹³ A komail kola, padakki wewen kajoi pot et: I kin polauleki kadek a kaidin mairon ijij. I kodon eker don kalula me dipan akan, a kaidin me pun kan. ¹⁴ En Ioanej a tounpadak kan ap pwara don re a potoan on: Da me kit o Parijär akan kin kaijejol pan pak toto, a japwilim omui tounpadak kan jota kin kaijejol? ¹⁵ Iejuj ap kotin majani on irail: Da, toun kamadip en kapapaud pan kak kamauk ni anjau ol kamot mi re 'rail? A kadekadeo eu ran ol kamoed pan peukawei jan irail, re ap pan kaijejol. ¹⁶ Jota amen me kin deipinaki likau kap likau marin, pwe me depin a pan teirok jan likau o, a por o pan laudela. ¹⁷ Pil jota amen me kin kodie on wain kap nan ed marin, a ma ei ed akan pan ola, a wain pan wudokela, o ed akan pan ola. A re kin kodie on wain kap nan ed kap, ira karoj ap nekinek mau. ¹⁸ Ni a kotin majani on irail mepukat, kilan jau-

peidi amen ap pedelon, poridi *on* i fotoan *on*: Nai jeripein apton melar, a ren kotido, pwil po a lim ar, a ap pan maureda. ¹⁹ Iejuj ari kotida idauenla i, o japwilim a tounpadak kan pil ian. ²⁰ A kilan, li amen, me nta pwilipwil par *naulriau*, a kai *on* pon palikia o jair imwin japwilim a likau. ²¹ Pwe a lamelame: Ma i doke japwilim a likau, i pan kelailada. ²² A Iejuj kotin jaupeila; a lao majani i, ap kotin majani: Jeripein kaporopor mau, om pojond me kakelail uk ada. A li o kelailadar ni auer ota. ²³ A Iejuj lao kotilon *on* nan im en jaupeidi o, ap majani jaunkajan o moromoron en aramaj akan, ²⁴ Ap kotin majani: Kowei *jan*, pwe jeripein en iota mēlar, pwe a mamair. Irail ap kaureki i. ²⁵ Aramaj akan lao kokok *jan*, i ap kotilon *on*, ale pa a, jeripein ap paurida. ²⁶ Mepukat ap lolok jili nan jap karoj. ²⁷ Iejuj lao kotila *jan* waja o, ol majkun riamen idauenla i, weriwer indada: Kupura kit, Komui japwilim en Dawid! ²⁸ A lao kotilon *on* nan im o, me majkun ko ap ko don i. Iejuj ari majani *on* ira: Koma kamelele, me I kak *on* wiada met? Ira fotoan *on*: Ei Main. ²⁹ I ap kotin jair maj ara majani: Duen oma pojond a pan wiaui *on* koma. ³⁰ Maj ara ari pad pajan. Iejuj ap kotin kalik ira di majani: Kalaka, pwe meamen de aja! ³¹ A ira koieilar katiti jili ni jap karoj. ³² Ira lao koieilar, kilan, irail ap wa don i aramaj amen, me loton o tewil ti poa. ³³ Tewil lao pakauja *jan*, me loton o ap lokaia; pokon o ap malamalauak kila indada: Nan dueta met a jaikenta wiauier nan Ijrael. ³⁴ A Parijär indada: Nan jaumaj en tewil akan me a kaujaki *jan* tewil akan. ³⁵ Iejuj ap kotin kakan

jili nan kanim laud o me tikitik kan kawewe nan ar jinakoke kan o padapadaki ronamau en wei, o kotin kakelada *jon* en jomau o luet akan karoj.³⁶ A lao majani pokon o, ap kotin kupuro kin irail, pwe irail joanianalar o dupokalar dueta jip akan, me jota jile parail.³⁷ I ap kotin majani *on* japwilim a tounpadak kan: Nan melel rak me kalaimun, a men dodok me malaaulau.³⁸ Komail ari poeki ren Kaun en rak, en kadarala toun dodok kan nan a rak.

10

¹ A LAO kotin molipe penaer japwilim a tounpadak ekriamen ap kotiki *on* irail manaman, en poedi *nen* jaut akan, pwen kauj ir wei o kamauiala *jon* en jomau o luet karoj.² A iet mar en wanporon ekriamen: Men maj Jimon, me maraneki Petruj, o ri a Andreaj, o Iakopuj nain Jepedäuj, o ri a Ioanej;³ Pilipuj o Partolomäuj, Tomaj o Matäuj jaunopwei men, Iakopuj nain Alpäuj, Lepäuj, me pil adaneki Tadäuj;⁴ Jimon men Kana o Iudaj Ijkariot men panala i.⁵ Ekriamen pukat, me Iejuj kotin poronela, kotiki *on* irail kujoned eu majani: Komail der weweid nani al en men liki kan o der pedelon *on* nan kanim en Jamaria.⁶ A kola ren jip akan en jaun Ijrael, me jalonalalar.⁷ A ni omai kokola komail padapadak indada: Wein nan lan korendor.⁸ Kakeada me jomau kan, o kamaureda, me melar akan, kamakelekeleda, me tuketuk kan, o kauje wei tewil akan; a duen komail aleer ni tiak en kijakij, iduen komail pan kijakij weita.⁹ Komail der wewa kold, de jilper, de mata nan omai ed akan.¹⁰ Pil der ed en jailok, de jakit riau, de jut,

de jokon, pwe toundodok me war *on* kan a kijin mana. ¹¹ A ma komail pan pedelon *on* nan kanim laud de tikitik eu, raparapaki, ma meamen mi lole, me war *on*; ari, komail pan mondi re a, lao komail pan ko wei jan. ¹² A ma komail pan pedelon *on* nan im o, komail pan ranamau *on* tou a kan. ¹³ O ma re war *on*, omail popol pan ko *on* irail; a ma re jowar, omail popol pan pure don komail. ¹⁴ A waja kij meamen jota pan kajamo komail, de jota men ron omail padak, komail ari pedoi jan nan im o de kanim, ap jepede jan pwel ni nä omail. ¹⁵ Melel I indai *on* komail, nan a pan monai *on* jap en Jodom o Komora ni ran en kadeik o jan kanim o. ¹⁶ Kilan I kadar komail la duete jip akan nan pun en kidi en wel; komail ari lolekon dueta jerpent, a tiak mau dueta muroi. ¹⁷ Perki aramaj, pwe re pan panalan komail kapun kan, o re pan kame komail nan ar jinakoke kan. ¹⁸ O Komail pan wijike won kaun o nanmarki kai pweki *nai*, pwen kadede *on* irail, o *on* men liki kan. ¹⁹ Irail lao panala komail, ede madamadaua duen tiak en omail pan lokaia; pwe a pan ko *on* komail, ni auer o me komail pan inda. ²⁰ Pwe kaidin komail, me lokaia, a *Nen* en Jam omail, me pan kalokaia komail. ²¹ Apirien eu, amen pan panala amen, pwen kamela, a jam na jeri, a jeri ko pan u *on* ar papa o nono, o jauaja, pwe ira en kamela. ²² O komail pan tantat ren aramaj karoj pweki ad ai; a me pan dadaurata, lei imwi i me pan dorola. ²³ A ma re pan kame komail nan eu kanim, komail ari tanala nan eu. Pwe melel I indai *on* komail, komail jota pan kanikiala kanim en Ijrael karoj, Nain aramaj lao pwarador.

24 Tounpadak jota kin laude jan a jaunpadak, de ladu laude jan a monjap. **25** A itar on tounpadak, en paroki on a jaunpadak o ladu dueta a monjap. Ma re kaadaneki kaun en im o Peeljepup, nan melel kualap, re pil pan wiai on toun im akan dueta. **26** Komail ari der majak irail, pwe jota me rir kot, me jo pan janjaleda, o me okiok, me jo pan kadiarokad. **27** Me I indai on komail nan rotorot, i me komail katiti nan marain; o me pan ko on nan jalon omal, i me komail pan kalok jili pon im akan. **28** Komail der majak irail, me kin kemela pali war, ap jota kak on kamela pali *nen*. A komail majak melel i, me kak on kajopokela pali war o *nen* nan pweleko. **29** Jiok riamen jota kin netila ni denar eu? Ari jo, jota amen ira pan pupedi nan pwel, ma jota pwilijan ren Jam omal. **30** Ari pit en mon' omal karoj me wadawad penaer. **31** Komail ari der majak, pwe komail me mau jan jiok toto. **32** Meamen pan ponaja ia mon aramaj, nan i me I pan ponaja ren Jam ai, me kotikot, nanlan. **33** A meamen ponjaja ia mon aramaj, nan i me I pil pan ponjaja ren Jam ai, me kotikot nanlan. **34** Eder kiki on, me I kodon kamuei maula jappa; kaidin muei mau, me I kokido, a kodlaj pot. **35** Pwe I kodon kialiak toror pajan aramaj on jam a, o jeripein on in a, a li o on en a paud a nono. **36** O pein toun im en aramaj amen pan a imwintiti. **37** Me pok on jam de in a lapa jan a pok on ia, nan a jowar ia. O me pok on na putak de jeripein lapa jan a pok on ia, nan a jowar ia. **38** A me jo ale a lopu o idauen ia do, nan a jowar ia. **39** Me pan diar maur, i me pan katia jan, a me kajela maur a pweki *nai*,

i me pan diarada. ⁴⁰ Meamen kajamo komail, kin kajamo ia, a me kin kajamo ia, nan a kin kajamo i, me kadar ia do. ⁴¹ Meamen kajamo jaukop amen ni mar en jaukop, pan ale pwain en jaukop amen. Me kajamo pun amen ni mar en me pun amen pan ale pwain en me pun amen. ⁴² O meamen pan ki on dal en pil lamelamur eu, pwe amen tikitik pukat en nim, ni mar en tounpadak amen, melel I indai on komail, a iota pan katia jan pwain a.

11

¹ KADEKADEO Iejuj lao kaimwijokela a majan on japwilim a tounpadak ekriamen, ap kotila jan waja o, pwen kaukawewe o padapadak nan ar kanim akan. ² A Ioaneij lao roner nan imaten wiawian Krijtuj, ap poronela a tounpadak kai. ³ Kalelapok re a: Ir me pan kotido, de jen auiaui amen? ⁴ Iejuj kotin jaben majani on irail: Komail kowei kaireki Ioanej, me komail ron o kilan: ⁵ Me majkun akan kin kilan waja, o me danidan kan kin alu, o me tuketuk kan kin makeladar, o me jalonepon kan kin ron waja, o me melar akan kin maureda, o ronamau kin loloki on me jamama kan. ⁶ O meid pai, me iota pan makar kin ia. ⁷ Mepukat lao kokola, Iejuj ap kotin tapiadar mamajani on pokon o duen Ioanej: Da me komail koieila en kilan nan jap tan? Alek pot, me kin dueduälokki an? ⁸ De da me komail koieila en kilan? Aramaj amen nan likau muterok? Kilan, me kin likau kida likau muterok, kin mi nan im en nanmarki kan. ⁹ De da me komail koieila en kilan? Jaukop amen? Ei I indai on komail a laude jan jaukop amen. ¹⁰ Pwe iei i, me intinidier: Kilan

I kadarala mo 'mui ai men kadar, me pan koko al mo 'mui. ¹¹ Melel I indai on komail, jota me ipwidi jan ren li akan, me laude jan Ioanej jaunpaptaij. Ari jo, me tikitik nan wein nanlan, iei me laude jan i. ¹² A jan ni muein Ioanej jaunpaptaij kokodo lel met wein nanlan kokido eta manaman, ari me manaman akan kin koledi on irail. ¹³ Pwe jaukop karoj o kapun kokopadar lao lel Ioanej. ¹⁴ O ma komail men duki on, nan iei Eliaj, me pan kodo. ¹⁵ Me jalon a mia, men ron, i en ron! ¹⁶ A da me I en karajai on di wet? A raj on jeri kan, me kin momod nan wajan net akan o likelikwir on kij arail, ¹⁷ Indada: Kit kajan on komail, a komail, jota kakalek; kit kauleki on komail kaul en mamauk, a komail jota janejan. ¹⁸ Pwe Ioanej pwarado, ap jota kan o nim, a re kin inda: Nan tewil kin ti poa. ¹⁹ Nain aramaj pwarado, manamana o nim, a re kin inda: Kilan, me kaped en mana o kamom jakau, kompoke pan jaunopwei o me dipan akan, a lolekon o kin diarok kida na jeri ko. ²⁰ A kotin tapiada kidaueda kanim akan, me a wiai oner manaman to to, aki re jota kalula: ²¹ Juedi on uk Korajin! Juedi on uk Petjaida! Pwe ma manaman akan, me wiaui on uk er, wiauier on Tiruj o Jidon, nan melel re pan pitipit kalula nan tuk en likau o nan paj. ²² A I indai on komail, a pan monai on Tiruj o Jidon ni ran en kadeik jan komail. ²³ A koe Kapernaum, me paidar lel nanlan, pan pijikindi nan pweleko; pwe ma manaman akan, me wiaui on uk er, wiauier on Jodom, nan a pan mimieta lao lel ran wet. ²⁴ A I indai on komail, a pan monai on jap en Jodom ni ran mi kadeik jan koe. ²⁵ Ni

anjau ota Iejuj kotin tapiadar majani: I kapina komui Jam, Kaun pan lan o jappa, me komui okila mepukat jan me lolekon o koiok kan, ap kajale on jeri pwelel akan. ²⁶ Ei Jam ai, pwe iduen me komui kupukupura. ²⁷ Meakaroj muei on ia er jan ren Jam ai, o jota amen, me aja japwilim a Ol, pwe Jam eta, o jota amen, me aja Jam, pwe japwilim a Ol eta, o me japwilim a Ol pan kajale on. ²⁸ Komail karoj, me panadar o toutoular kodo re i I pan kamoleilei komail la. ²⁹ Ale on komail ai iok, o padakki jan ia; pwe Nai me opampap o karakarak melel, komail ari pan diarada kamol pan nen omail. ³⁰ Pwe ai iok me manai, o katoutou pai me marara.

12

¹ I ANJAU o Iejuj kotila nan mat en korn ni ran en japat, a japwelim a tounpadak kan men manadar, rap doluna jan wan korn o kankan. ² Parijär lau kilaner mepwukat, rap patoan on i: Majani, japwilim omui tounpadak kan kin wiada, me jota pun, en wiaui ni ran en japat. ³ A kotin majani on irail: Komail jota doropwe, me Dawid wiadar ni a o ian akan men manadar? ⁴ Duen a pedelon on nan im en Kot o kankan prot en kajanjal, me jota pun, i o ian akan en kan, pwe jamero akan eta. ⁵ De komail jota wadoker nan kapun o, duen jamero akan ar kin kaupali ran en japat nan im en kaudok ni ran en japat, ap jota dip arail? ⁶ A I indai on komail, i, me laude jan im en kaudok, mi waja kij et. ⁷ A ma komail pan aja wewen kajoi pot et: I kin polauleki kadek a kaidin mairon ijij, komail jota pan kadeikada me makelekel akan.

8 Pwe nain aramaj pil udan Kaun en japat. **9** A kotila jan waja o, ap kotilon on nan ar jinakoke. **10** A kilan, aramaj amen mia, me pa a motorlar. Irail idok re a indada: Me pun, en kakelailada ni ran en japat? Pwe ren kadipa i. **11** I ari kotin majani on irail: Ij aramaj nan pun omail, me na jip amen mia, ma a pupedi on nan por ni ran en japat, a jo pan poridi on, kida jan? **12** A iaduen aramaj amen jota kajampwal kaualap jan jip amen? I me aramaj amen kak wia kida me mau ni ran en japat. **13** I ap kotin majani on aramaj o: Kapa wei pa om! I ari kapa wei, ap maular dueta pali teio. **14** Parijär ap pedoi jan o kapukapun pena, duen ar pan kamatala i. **15** Iejuj lao mani met, ap kotila jan waja o, a pokon kalaimun idauenla i; i ari kakelailadar irail karoj. **16** O majani on irail, ren der kalok jili i. **17** Pwen pwaida, me lokido ren jaukop Iejaia, me majani: **18** Kilan, i ai ladu, me I piladar, o kompokepa i, me I kin polaule kida. I pan aude kin i Nen i, o a pan kajale on men liki kan duen kadeik o. **19** Nan a jota pan akamai de weriwer, o jota amen me pan ron nil a pon al akan, **20** A jota pan katip pajan alek luet o, o a jota pan kakundi wik inkinkon o, lao a pan kaimwijokala kadeik o. **21** O men liki kan pan kaporoporeki mar a. **22** Me tewil ti poa men, me majkun o loton ap wijike don i; i ari kakelailada i, a me majkun o loton ap lokaia o kilan waja. **23** Aramaj karoj ap malamalauak kila indada: Kaidin i japwilim en Dawid? **24** A Parijär akan lao ronadar, rap indada: Nan jota, me lap en kaujeki wei tewil akan, Peelje pup eta, jaumaj en tewil akan. **25** I ari ani ar

lamelam majani on irail: Wei karoj, ma tou a kan pan u pena nan pun ar, a pan ola, o ma toun kanim de toun im eu pan u pena nan pun ar, a jota pan pwaida. ²⁶ O ma Jatan pan kauje wei Jatan, a pan u on pein i, a iaduen a wei pan kak pwaida? ²⁷ Ma I kin kaujeki wei Peeljepup tewil akan, a ij me noumail jeri kan kin kauje kin irail? Irail ari pan omail jaunkapun. ²⁸ A ma I kaujaki wei Nen en Kot tewil akan, nan wein Kot lel on komail er. ²⁹ De iaduen, ij me pan kak kolon on nan im en me kelail amen, kulia jan a kapwa, ma a jo jaliedi maj me kelail o? A ap pan kak kulia jan a kapwa. ³⁰ Meamen me jota ian ia, iei me palian ia; o me jota kin dolun penan ia, iei me kin kajapoka pajan. ³¹ I me Nai indai on komail, dip karoj o lalaue pan kak lapwa jan aramaj, a lalaue on Nen jota pan lapwa jan aramaj. ³² O me pan lalaue Nain aramaj, a pan lapwa jan i; a me pan lalaue Nen jaraui, a jota pan lapwa jan i, jota nan muei met pil jota nan muei kokodo. ³³ Padukedi tuka mau pot, a wa pan mau; de padukedi tuka juep apot, a wa pan juep. Pwe tuka kin diarok kida wa. ³⁴ Wan jerpent komail, iaduen komail kak lokaia mau, pwe komail me juep? Pwe aua kin lokaia jan nan audepan monion o. ³⁵ Aramaj mau kin kida me mau jan nan pai mau en monion i, a aramaj juep kin kida me juep jan nan pai juep en monion i. ³⁶ A I indai on komail, lokaia mal karoj, me aramaj inda, pan puk on ir ni ran en kadeik o. ³⁷ Pwe jan ni om kajokajoi koe pan kapun kila, o jan ni om kajokajoi koe pan pakadeikada. ³⁸ Jaunkawewe o Parijär kai ap jaben i indada: Jaunpadak, je men

kilan kilel eu jan re omui ³⁹ A i me kotin jaben majani on irail: Di jueud o kamal o kin rapaki kilel eu, a jota kilel eu, me pan janjal on irail, pwe kilel en jaukop Iona eta. ⁴⁰ Pwe duen Iona a mimi nan kaped en mam kalaimun amen ran jilu o pon jili pon, iduen Nain aramaj pan mimi nan monion en jappa ran jilu o pon jili pon. ⁴¹ Ol en Niniwe kan pan u on di wet ni kadeik lapalap o pan kadeikada, pwe re kalula ni ar ronadar padak en Iona, a kilan, me laude jan Iona mi met. ⁴² Li nanmarki en pali air amen pan u on di wet ni kadeik lapalap o pan kadeikada; pwe a pwurado jan ni imwin jappa, pwen ron lolekon en Jalomo. A kilan me laude jan Jalomo mi met. ⁴³ Nen jaut lao kowei jan ren aramaj o, a kin tanatan jili nan jap tan akan, rapaki wajan kamol, a jota, me a diarada. ⁴⁴ I ap kin inda: I pan purelon nan im ai, me i pedoi janer. A lao puredo, a diar me a tan, kokok, o kapwater. ⁴⁵ I ari mi koieila, ale on i nen ijimen, me jueud jan pein i; irail lao pedelon on lole, rap kaukaujon ia, a aramaj pan jueud jan maj. Iduen a pan wiaui on di jueud wet. ⁴⁶ A ni a kotin majani on pokon o mepukat, kilan, in a o ri a ol akan u liki, re men lokaia on i. ⁴⁷ Amen ap potoan on i: Re kotin mani, in ar o ri ar ol akan mimi liki o men lokaia on ir. ⁴⁸ A a kotin jaben majani on, me kaireki on i: Ij in ai o ij ri ai ol akan? ⁴⁹ Ap kotin kapawei lim a pon japwilim a tounpadak kan majani: Kilan, in ai o ri ai ol pukat! ⁵⁰ Pwe meamen, me kin wia kupur en Jam ai, me kotikot nanlan, nan i me ri ai ol, o ri ai li, o in ai.

13

¹ NI ran ota Iejuj kotila jan nan im o, ap kaipokedi pon oror. ² A pokon kalaimun pokon don i, i ari *kotidan* pon jop pot, kaipokedi, a pokon o udar pon oror o. ³ I ari karajerajeki *on* me toto majani: Kilan, jaunkamor o kolan kamorok. ⁴ Ni a kamokamorok, akai ap moredier *on* pon kailan al, manpir ap pirido nam ir ala. ⁵ A akai moredier waja takain, waja pwel pedeped; ir ari pitipit wojadar pweki iota pwel lole. ⁶ A katipin lao dakaradar, re motoredier o monelar, pweki iota kalau ar. ⁷ A akai moredier nan tuka teketek; a tuka teketek wojadar kajoka ir ala. ⁸ A akai moredier nan pwel mau o wadar: Akai pan me epuki, akai me woneijok, akai me jileijok. ⁹ Me jalón a mia, men ron, i en ron! ¹⁰ Tounpadak kan ap pwarado potoan *on* i: Da me re kotin kaukawewe *on* irail ni karajeraj akan? ¹¹ A kotin jaben majani *on* irail: A muei *on* komail er, en aja, me rir en wein nanlan, a ap iota muei *on* mepukat. ¹² Pwe me a mia, ekij pan ko *on*, pwen aneki me laud; a me iota a mia, nan a pan katia jan, me mi re a. ¹³ I me I padaki *on* irail ni karajeraj. Pwe re kilan waja, ap iota kin kilan, o ron waja, ap iota kin ron, pwe re iota kin dedeki. ¹⁴ Nan irail kapun pan kokop en Iejaia, me majanier: Komail pan ronki jalón omai, ap iota dedeki, o kilanki maj omai, ap iota weweki. ¹⁵ Pwe monion en aramaj pukat kapitakailar, o jalón arail ponlar, o re kamair pena maj arail. Pwe kadekadeo re de kilanki maj arail, o ronki jalón arail, o lolokonki monion arail, o wukila, a I de kakel irail ada. ¹⁶ A maj omai meid

pai, pwe re kilan waja, o jalon omail, pwe re ron waja. ¹⁷ Pwe melel I indai on komail, jaukop o me pun akan me toto, me anane en kilan, me komail kin kilekilan, ap jota kilaner, o en ron, me komail kin roneron, a re jota ronadar. ¹⁸ Komail ari ron karajepa wet duen jaunkamorok: ¹⁹ Meamen ron majan duen wei o ap jota dedeki, me juep ap pwarado, katia jan, me kamoremoredier nan monion i, a iei i, me ale war akan pon kailan al o. ²⁰ A me kamoremoredier waja takain, iei i, me kin ronada majan o, ap pitipit peren kida ale; ²¹ A jota kalau a re a, pwe a lol majaran, pwe anjau apwal o kamekam lao pwaida pweki majan o, a ap madan makar kida. ²² A me kamoremoredi on nan tuka tekete, iei i, me kin ronada majan o, a anan en pai en jappa o widin en dipijou kan kin kajokela majan o, ap jo wa. ²³ A me kamoremoredi nan pwel mau, iei i, me kin ronada majan o, ap dedeki o wada; akai kin pan me epuki, a akai me woneijok, a akai jileijok. ²⁴ A kotiki on irail er pil apot karajeraj majani: Wein nanlan rajon aramaj amen, me kamoredi war mau nan jap we. ²⁵ A aramaj lao mairelar, a imwintiti ap pwarado kamoredier dip nan pun en korn ap koieila. ²⁶ A tuka lao wojadär o wadar, dip ap pil pwaradar. ²⁷ Ladu en kaun pan im o kan ap pwara don i potoan on i: Main, kaidin war mau, me kom kotin kamoredier nan jap omui? A iaduen dip, a ko jan ia? ²⁸ A majani on irail: Aramaj mor juep amen me wiadar. Ladu kan ap potoan on i: Kom kotin mauki, jen kola matiada jan? ²⁹ A majani: Iermen, pwe komail der matia jan dip ianaki korn. ³⁰ A

karoj pan mimieta lao anjaun rak; ni anjaun rak i pan indan men dolun kan: Ki pena maj dip akan, pira pena ni kap akan, pwe aramaj en karonala, a korn ki pena nan ai im en nak. ³¹ A kotiki on irail pil apot karajeraj majani: Wein nanlan rajon wan tuka eu, me aramaj amen ale, padukedi on nan jap we, ³² Me tikitik jan war karoj, a a lao wojada, a kalaimun jan dip akan, o wiala tuka laud apot, manpir en pan lan akan ap pokon pena o mimi nan ra a kan. ³³ A pilapot karajeraj me a kotin majani on irail: Wein nanlan rajon kalep kij, me li amen ale okila nan kajak en plaua jilu, karoj lao mutala. ³⁴ Mepukat karoj Iejuj kotin padapadaki ni karajeraj on pokon o, o iota, me a kotin padaki on irail, ma iota ni karajeraj. ³⁵ Pwen pwaida me lokido ren jaukop o, me majani: I pan ki pajan au ai, pwen karajeraj o pan kasanjaleda me rir akan jan ni tapin kaua. ³⁶ A ap kotin kadar pajan pokon o, kotilon on nan tanpaj o. Japwilim a tounpadak kan ap kai don i potoan on: Re kotin kawewe on kit karajepan dip nan matual o. ³⁷ A kotin jaben majani: Me kamoredi war mau, iei Nain aramaj. ³⁸ Matuel iei jappa. War mau iei toun wei. Dip iei nain mejued. ³⁹ Imwintiti, me kin kamor ir edi, iei tewil. Rak me kaimwijoke pan jappa. Jaundolun pene iei tounlan kan. ⁴⁰ A duen dip akan a kin uja jan ron kila kijiniae, iduen a pan wiaui ni imwin kaua. ⁴¹ Nain aramaj pan kadarala na tounlan kan, o re pan ki jan nan wei men kamakar karoj, o me kin wiawia me jueed. ⁴² O re pan kajapok ir alan len kijiniae iei wajan mamaiei o teterok. ⁴³ Me pun kan ap pan linalin

dueta katipin nan wein Jam arail. Me jalon a mia, men ron, i en ron! ⁴⁴ Wein nanlan rajon pai eu, me rir nan matuel, me aramaj amen diaradar ap okila, o peren kida, koieila, netikilar karoj, me a naineiki, ap netiadar matuel o. ⁴⁵ Wein nanlan pil rajon jaunet amen, me raparapaki takai kajampwal kai. ⁴⁶ A lao diaradar eu, me kajampwalia, ap koieila netikilar a dipijou karoj, netiada i. ⁴⁷ Wein nanlan pil rajon uk apot, me kin kadudi nan jed, pwen oro pena jon karoj. ⁴⁸ A lao direla, re kin apiadado pon oror, ap mondi pena, deuk on me mau akan nan dal akan, a me jueg akan re kin kajela. ⁴⁹ Nan iduen a pan wiaui ni imwin kaua: Tounlan kan pan koieila, katoror jan me jueg akan me pun kan. ⁵⁰ O kajapok ir alan len kijinai, iei wajan maiei o teterok. ⁵¹ Iejuj kotin majani on irail: Komail weweki mepukat karoj? Re potoan on: Ei Main. ⁵² A ap kotin majani on irail: I me jaunkawewe karoj, me jukujukuleki wein nanlan me rajon kaun pan im eu, me kin kapwareda jan a pai me kap o me marin. ⁵³ Kadekadeo Iejuj lao kaimwijokela karajeraj pukat, ap kotin koieila jan waja o. ⁵⁴ A koti don udan jap we kawewe on irail nan ar jinakoke. Irail ari puriamui kila indada: Lolekon en Ol men et o a manaman akan ko jan ia? ⁵⁵ Kaidin i nain kapenta? In a jota adaneki Maria? O ri a ol akan Iakop, o Iojep, o Jimon, o Iudaj? ⁵⁶ O ri a li akan, kaidin irail karoj mi re atail? Ari, ia waja mepukat ko jan ia? ⁵⁷ O irail makar kin i. A Iejuj kotin majani on irail: Jota waja me jaukop jo wauia ia, nan jap we ota o ren jau i ko. ⁵⁸ I ari jota wiadar manaman toto waja o pweki ar jopojon.

14

¹ I DOKAN nanmarki Erodej roner duen wiawia en Iejuj. ² Ap majani on japwilim a ladu kan: Nan i Ioanej jaunpaptaij, a mauredar jan ren me meler akan, i me a wia kida manaman pukat. ³ Pwe Erodej koledier Ioanej o jaliedier on nan imaten pweki Erodiaj en ri a Pilip a paud. ⁴ Pwe Ioanej me majani on i: A jota muei on komui en ale i. ⁵ O a men kamela i, a a majak aramaj akan, pwe re wiakin i jaukop amen. ⁶ A en Erodej a ran en ipwidi wiauier, nain Erodiaj jeripein ap kakalek mo 'rail, i me Erodej peren kidar. ⁷ I ari inauki on i, me a pan ki on i, meakaroj, me a pan poeki, ap kotin kaula, ⁸ A lao pwili jan in a, ap potoan on: Kotiki don ia monan Ioanej jaunpaptaij pon dal wet. ⁹ Nanmarki ap kupur juedelar; a pweki a kaula o pweki irail, me ian i kot ni tepel o, a majani ren ki on i. ¹⁰ I ari poronelar en lepuk jan manan Ioanej nan imaten. ¹¹ Mona ap wijikedor pon dal eu, ap panalan jeripein o, i ap wala ren in a. ¹² A tounpadak kan ap pwarador, ale kalep a, jarepedier, rap kola kaireki Iejuj. ¹³ Iejuj lao mani mepukat, ap kotin ianalar jop pot, kotilan jap tan eu. Pokon lao ronadar, rap idauenla i japajapal jan nan kanim akan. ¹⁴ A lao kotila jan waja o, ap kotin majani pokon kalaimun, ap kupuro kin ir ala, o kotin kakelada, me jomau re 'rail. ¹⁵ A lao jautik penaer japwilim a tounpadak kan kaidon i potoan on: Jap tan eu met o anjau daulier; re kotin kadar pajan pokon o, pwe ren kola nan kanim akan, netiada kan ar mana. ¹⁶ A Iejuj kotin majani on irail: Jota kare pan ar kola, komail pan katunole

irail. ¹⁷ A irail potoan on i: Jota at tunol met, lopon en prot eta limau o mam eta riamen. ¹⁸ A a kotin majani: Wa don ia! ¹⁹ A ap kotin majani, pokon en mondi nan ra, ap kotikida lopon en prot limau o mam riamen, ap kotin majanda nanlan, laolaoki pilitiki pajan o kotiki on tounpadak kan lopon en prot oko a tounpadak kan ap nek on pokon o. ²⁰ Irail karoj ari mana o medier; rap deuk pena kopou en maremor eijok riau luan kamadip o. ²¹ A irail, me manaer, me ol limekid a li o jeri kan jota ian wadawader. ²² A ap kotin pain tounpadak kan, ren keredi pon jop pot, pwe ren madanwei mo a lel palio, lao a pan kotin kadar pajan pokon o. ²³ A lao kotin kadar pajan ponkon o, ap kotin kelepelar pon nana eu, pwen laolao. A lao, jautik penaer i eta, me kotikot waja o. ²⁴ A jop o mi ni ailepan jed o lujilujeki iluk kan pwe an udo jan moa. ²⁵ A kadekadeo nan lukepan pon Iejuj ap kotikot ko don irail pon jed o. ²⁶ A tounpadak kan lao kilaner i kotikot jili pon jed o, ap majapwekadar indada: Ani amen! Irail ap weriwer pweiki ar majak. ²⁷ A Iejuj kotin madan kajoi on irail majani: Kaporopor mau, pwe Nai met, der majak! ²⁸ A Petruj jaben i patoan on: Main, ma ir, re kotin majan don ia, i en kowei re ir pon pil o. ²⁹ A ap kotin majani: Ukedo! Petrus ap keredier jan nan jop o, weweid pon pil o, pwen kola ren Iejuj. ³⁰ A lau kilaner an ma, ap majapwekadar, a ni a pan kirila, a weriwer indada: Main kupwura ia! ³¹ Iejuj kotin madan kapawei lim a koledi i, majani on i: O koe meid pojontikitik, da me koe jo pojontki? ³² Ira lao kotidar pon jop o an ap moledier. ³³ A toun jop o ap

kaion i, poridier potoan on: Melel ir me Japwilim en Kot! ³⁴ Irail lao kotin kotela, rap kotilan jap Kenejaret. ³⁵ Toun jap o lao aja i, rap kadar jili waja karoj, o re wa don i me jomau kan karoj, ³⁶ O poeki re a, ren potoan jair ta imwin japwilim a likau. A karoj, me jair i kelailadar melel.

15

¹ PARIJÄR o jaunkawewe kan ap ko don i jan Ierujalem, kalelapok re a: ² Menda japwilim omui tounpadak kan tiakedi padok en kaua ko? Pwe re jota kin omiom ni ar pan kan prot. ³ A i kotin jaben majani on irail: Menda komail pil tiakedi kujoned en Kot pweki omailpadok kan? ⁴ Pwe Kot kotin kujonedadar majanier: Kakaki jam om o in om, o meamen lalaue jam a de in a, i en kamela. ⁵ A komail kin inda: Meamen indan jam a o in a: Korpan, iet wewe: Mairon eu, me koe men aneki jan ia; komail inda, dene jota dip a; i ari jota pan kakaki jam a o in a. ⁶ Iduen omail tiakedi kujoned en Kot pweki omail padok kan. ⁷ Malaun akan komail, nan melel, me Iejiaia kokopadar iran komail, ni a majani: ⁸ Aramaj pukat kin kaka kin ia au arail, a monion arail me doo jan ia; ⁹ Ari, me mal ar kaudok ia, pwe kujoned en aramaj eta, me re kin kaukawewe. ¹⁰ I ari molipe pena aramaj akan majani on irail: Ron o weweki! ¹¹ Kaidin me kin ko on nan aua kin kajaminela aramaj, a me kin ko jan nan aua, i me kin kajaminela aramaj. ¹² Tounpadak kan ap kodo, potoan on i: Re kotin mani, me Parijär akan makar kida ni ar ronadar majan o? ¹³ A kotin jaben majani:

Tuka karoj, me kaidin Jam ai nanlan, padukedier, pan weiweida. ¹⁴ Puei jan irail; irail me majkun, ap kalua me majkun akan. A ma me majkun amen pan kalua me majkun, nan ira karoj pan pupedi on nan por o. ¹⁵ Petruj ap jaben potoan on i: Re kotin kawewe on kit karajeraj pot et. ¹⁶ I ari kotin majani: Komail pil jota lolekon? ¹⁷ Komail jaikenta weweki, meakaroj, me kin ko on nan aua kin kodilon on nan kaped o ap kin kajapokela? ¹⁸ A me kin ko jan nan aua, kin tapida jan nan monion, o i me kin kajaminela aramaj. ¹⁹ Pwe jan nan monion o lamelam jued kin tapi jan ia: Kamela aramaj, o kamal, o nene, o pirap, o kadede likam, o lalaue. ²⁰ Jon pukat, me kin kajaminela aramaj. A jo omiom ap mana jota kin kajaminela aramaj. ²¹ Iejuj ap kotila jan waja o, kotilan wein Tiruj o Jidon. ²² A kilan, li en Kanaan amen, me kodo jan waja o, likelikwir on i, potoan on: Kupura ia! Main, ir me japwilim en Dawid! Nai jereipein waiwairokki tewil. ²³ A a jota kotin jaben i meakot. Japwilim a tounpadak kan ap kai don i poeki re a potoan on: Re kotin kadarala i, pwe a kin likelikwir don kitail. ²⁴ A kotin jaben majani: Jota me I pakadara don, pwin jip en jaun Ijrael eta, me jalnalar. ²⁵ A a kodo, poridi on i potoan on: Main, re kotin kupura ia! ²⁶ A kotin jaben majani: A jota mau, en ale en jeri ar tunol prot ap kajedi on ren kijin kidi kan. ²⁷ A potoan on: Melel Main, ari jo, kijin kidi kan kin namenam maremor akan, me kin pupedi jan ni tepel en ar jaumaj. ²⁸ Iejuj ap kotin jaben majani on i: O li, om pojona mo laud! A pan wiaui on uk duen me

koe inon ion. Na jeripein ap kelailadar ni auer ota.

²⁹ Iejuj ari kotila jan waja o, koti don liman jed en Kalilää, a lao kotida pon dol eu ap kaipokedi waja o. ³⁰ O pokon kalaimun pokon don i, me wado me danidan kai, o me majkun, o me loton, o me jikilikil, o jon toto, ap pwilikidi ni aluwilua. A ap kotin kakelail ir ada. ³¹ Pokon o ap puriamuiki ni ar kilan, me loton akan lokolokaia, o me jikilikil akan kelailadar, o me danidan kan alialu, o me majkun akan kilan waja; rap kapina Kot en Ijrael.

³² Iejuj lao molipe pena japwilim a tounpadak kan a kotin majani: I ap pokela pokon en, pwe re mi re i ran jilu ap jota kan ar mana, a I jota pan kadar ir ala ni ar jota manaer, pwe ren der dupokala pon al o. ³³ Japwilim a tounpadak kan ap potoan on i: Je pan kijan ia prot toto, men kamedela pokon et nan jap tan wet? ³⁴ Iejuj kotin majani on irail: Lopon en prot me depa mi re omail? Irail potoan on: Me iju o kijin mam kij. ³⁵ I ari kotin majani on pokon o, en mondi on nan pwel o, ³⁶ Ap kotikidar lopon en prot iju o kijin mam akai, laolaoki, pwilitiki pajan o kotiki on japwilim a tounpadak kan, a tounpadak kan ap nek on pokon o. ³⁷ Irail karoj ari manaer, o medier; irail ap deuk pena kopou iju luan kamadip o. ³⁸ A irail, me manaer, me ol pakid, a li o jeri kan jota ian wadawader. ³⁹ A lao kotin kadar pajan pokon o, a kotilan pon jop pot, koti don impan Maktala.

16

¹ PARIJÄR o Jadujär akan ap ko do, kajonejon i o poeki i kilel eu jan nanlan. ² A ap kotin jaben majani on irail: A lao jautiker komail kin inda:

Lakap a pan ran kajelel eu, pwe lan me waitata.

³ A ni manjan: A pan katau, pwe lan me waitata o rotorot. Komail kak on kajauuada mom en lan, a komail jota kak kajauuada kilel en anjau. ⁴ Di jued o kamal o kin nonki kilel eu, a jota kilel eu, me pan janjal on irail, pwe kilel en Iona eta. I ari kotin muei jan irail o koti wei. ⁵ Japwilim a tounpadak kan lao kotela lel palio, ap jota arail prot, pwe re monokelar. ⁶ A Iejuj kotin majani on irail: Kalaka o pereki kalep en Parijär o Jadujär akan! ⁷ Irail ari kajokajoi nan pun arail indada: Nan pweki jota atail prot, me je wado. ⁸ Iejuj lao mani mepukat, ap kotin majani: Komail meid jopojon, menda komail kajokajoi nan pun omail, iran omail jota wado prot oko? ⁹ Komail jaikenta dedekila o komail jota tamanda lopon en prot limau ren aramaj limekid o kopou depa, me komail deuk penaer? ¹⁰ Pil jo lopon prot iju ren aramaj pakid, o kopou depa, me komail deuk penaer?

¹¹ Daduen, komail jo lolekongki, me kaidin kijin mana, me i kajokajoi; pwe komail en pereki kalep en Parijär o Jadujär akan, ¹² Irail ap weweki, me a kaidin majanier, me ren kalaka kalep en prot, pwe ren kalaka padak en Parijär o Jadujär. ¹³ Iejuj lao koti don wein Jäjarea Pilipi, ap kotin kainoma ren japwilim a tounpadak kan majani: Da me aramaj kin inda, ij me nai, Nain aramaj? ¹⁴ Irail potoan on: Akai: Ioanej jaunpaptaij, a akai: Eliaj, o pil akai: Ieremiaj de amen ren jaukop oko. ¹⁵ Ap kotin majani on irail: A komail, ij me komail kin inda me nai? ¹⁶ Jimon Petruj ap jaben potoan on: Ir me Krijtuj, Japwilim en Kot ieiaj! ¹⁷ Iejuj ap

kotin jaben majani on i: Koe meid pai Jimon nain Iona, pwe kaidin uduk o nta, me kajale on uk met, pwe Jam ai, me kotikot nanlan, ¹⁸ A I pil indai on uk, koe Petruj, a I pan kauada pon paip wet ai momodijou a wanim en pweleko kan jota pan kak kawela i. ¹⁹ I pan ki on uk kapiri pan wein nanlan kan. A meakot koe pan jaliedi nin jappa, pan jalidi nanlan; o meakot, koe pan lapwada nin jappa, pan lapwada nanlan. ²⁰ A ap kotin majani on japwilim a tounpadak kan, me ren der indan meamen, me i me Krijtuj. ²¹ I anjau me Iejuj kotin tapiadar kajale on japwilim a tounpadak kan, me a pan kotilan Ierujalem o kalokolok laud ren jaumaj akan, o ren jamero lapalap akan, o ren jaunkawewe kan, o me a pan kalokolok toto o kamela o ni ran kajilu a pan maureda, ²² Petruj ap ukadar i, kapukapun i indada: Main re kotin kupura pein ir, mepukat jota pan pwai on ir! ²³ A ap kotin jaupeido majani on Petruj: Kola muri Jatan! Koe men kamakar on ia, pwe om lamelam kaidin en Kot, a en aramaj, ²⁴ Iejuj ap kotin majani on japwilim a tounpadak kan: Meamen pan idauen ia en tounmeteki pein i, ap wada a lopu, idauen ia. ²⁵ Pwe meamen dorela maur a, pan pupe jan, a meamen kajela maur a pwreki nai, i me pan diarada. ²⁶ Pwe da kadepa on aramaj o, ma a aneki jappa pon, ap kajela maur a? De da me aramaj pan kak kida, pwen kajapaledo maur a? ²⁷ Pwe Nain aramaj pan kokido linan en Jam a, o japwilim a tounlan kan pan ian i; i ari pan pwain on aramaj akan duen ar wiawia kan. ²⁸ Melel I indai on komail, akai me ian mimi met, me jota pan mela, irail lao kilan Nain aramaj a

kodo nan a wei.

17

¹ MURIN pon wonu pon Iejuj ap kotin ukadar Petruj, o Iakopuj, o ri a Ioanej kalua ir dalan pon nana ileila eu kalapuk. ² I ari kotin linanla mo 'rail jilan i linalin dueta katipin, o japwilim a likau o puetpuet eta marain eu. ³ A kilan, Mojej o Eliaj pwara don ir, kajokajoi on i. ⁴ Petruj ap jaben potoan on Iejuj: Main, meid mau atail kotikot met. Ma re kotin mauki je pan kauada kijin im jili kij: Tanpaj ar, o eu japwilim en Mojej, o eu japwilim en Eliaj. ⁵ Ni a kajokajoidar, kilan, pali en dapok pali ap kadupal irail edi; o kilan, nil eu peidido jan nan dapok o, me majani: Iet nai Ol kompok, me I kin polaule kida! Komail ron i! ⁶ Tounpadak kan lao ronadar met, rap pupedier pon maj arail, majapwekadar kaualap. ⁷ Iejuj ap kotido, jair ir, majani: Uda, der majak! ⁸ Irail lao jaradar, jota amen, me re kilaner, pwe Iejuj eta. ⁹ Ari, ni arail kotikot kodido jan ni nana o, Iejuj ap kotin majani on irail majani: Komail depa indai on meamen duen kajanjal o, Nain aramaj lao mauredar jan ren me melar akan. ¹⁰ Japwilim a tounpadak kan kalelapok re a indada: Da me jaunkawewe kan kin indinda, dene Eliaj pan kotido maj? ¹¹ A kotin jaben majani on irail: Nan melel, Eliaj pan pwarado maj kapunala karoj. ¹² A nai indai on komail, Eliaj me pwaradoer, a re jaja i, pwe irail wiai on i meakan, me re men wiada. Iduen Nain aramaj pil pan kamekam re 'rail. ¹³ Tounpadak kan ap ajadar, me a kotin majani on irail duen Ioanej jaunpaptaij o. ¹⁴ Irail lao lel don pokon o,

aramaj amen poto don i kelepuki mo a jakaradar:
 15 Main kupura nai ol o, pwe a pweipwei o madak
 kaualap, pwe pan pak toto a kin pupedi nan iai
 o nan pil, 16 Nai ari wa don i ren japwilim ar
 tounpadak kan, a irail jota kak kakelada i. 17 Iejuj
 ap kotin jaben majani: Di wet meid jopojon o
 katiwo. Ia arain ai pan mi re omail? Ia arain ai pan
 kokoa komail? Wa don ia! 18 Iejuj ap kotin kidaua
 i, tewil ari kodi jan lole; putak o ap kelailadar ni
 auer ota. 19 A tounpadak kan ap kelep poto don
 Iejuj potoan on: Da me kit jo kak kaujeki wei jan
 i? 20 A ap kotin majani on irail: Aki omail jopojon.
 Pwe melel I indai on komail, ma omail pojona pan
 laude on wan katirin, komail pan kak indan nana
 wet: Koda jan waja en, kola monen! I ap pan
 kola, jota me jota pan kak pa omail. 21 Jon wet
 jota kin koki jan meakot, kapakap o kaijejol eta.
 22 A ni ar kotikot jili nan wein Kalilää, Iejuj kotin
 majani on irail: Nain aramaj pan panalan nan pa
 en aramaj. 23 Irail pan kamela i, a ni ran kajilu a
 pan maureda. Irail ari mamauk kaualap. 24 Irail
 lao kotilon on nan Kapernaum, jaunopwei kai ap
 ko don Petruj indan i: Omail Jaunpadak jota kin
 ian nopwei? 25 A majanier: Ei. A lao pedelon on
 nan im o, Iejuj ap kotin madan majani: Jimon,
 da me koe lamelame, nanmarki en jappa kin ale
 takjij de nopwei jan ren ij? Jan ren nairail jeri de
 jan men liki kan? 26 Petruj potoan on i: Jan ren
 men liki kan. Iejuj kotin majani on i: Ari, jeri kan
 me jaladok. 27 Ari jo, pwe kitail der kamakar irail
 ada, kola ni oror kajedi kaj, a mam men maj, me
 pan lodi, apiada, kajara pajan au a, koe pan diar

lepen moni lep; i me koe pan ale o kida ai o noum.

18

¹ NI auer ota tounpadak kan poto don Iejuj potoan on: Iaduen ij me pan lapalap nan wein nanlan? ² Iejuj lao kotin molipeido kijin jeri amen, ap kotin kotiki on nan pun arail, ³ Majani: Melel I indai on komail, ma komail jota pan wukila, wiala jon en kijin jeri, komail jota pan kak ko on nan wein nanlan. ⁴ Ari, meamen pan kajapwiledi pein i, dueta kijin jeri men et, i me pan lapalap nan wein nanlan. ⁵ O ma amen apwali kijin jeri men due met ni ad ai, i me kin apwali ia. ⁶ A meamen me pan kamakar amen ir, me tikitik, me pojona ia, a mau on, takai en plaua eu en jali on tapin wora, ap kamopela nan madau waja me lol. ⁷ Juedi on jappa pweki a men kamakar akan, Ari jo, men kamakar akan udan mia; juedi on aramaj o, me men kamakar pan tapi jan ia. ⁸ A ma apali en pa om de apali en nä om pan kamakar uk, lepuke jan, o kaje jan uk, pwe a mau on uk ko on maur ni om danidan de jikilikil, jan om pa de nä pokon mia, ap ko on kijiniai joutuk. ⁹ O ma apali en maj om pan kamakar uk, waikada jan o kaje jan uk, pwe a mau on uk, ko on maur ni om maj pali, jan maj om pokon mia ap lokidokila nan iai en pweleko. ¹⁰ Kalaka, pwe komail der mamaleki amen tikitik pukat; pwe I indai on komail, me arail tounlan kan, me mi nanlan, kin ariri Jam ai, me kotikot nanlan. ¹¹ Pwe Nain aramaj kodon dorela, me jalonalalar akan. ¹² Da me komail lamelame, ma aramaj amen, nainekei jip epuki, a amen irail pan jalonalala, a jo pan pwilikidi duekduamen pon

nana, ap kola raparapaki me jalonalala? ¹³ A ma a pan diar, melel I indai on komail, a pan peren kida, me men en jan duekduamen, me jota jalonalalar. ¹⁴ Iduen Jam omail, me kotikot nanlan, jota kotin men, amen kijin jeri pukat en jalonalala. ¹⁵ A ma ri om ol wia dip on uk, en kelep kila i, kapun on i dip a; ma a pan ron uk, nan koe kajapaledo ri om. ¹⁶ A ma a jota pan ron uk, ap ukada amen de riamen, pwe meakaroj en mi ren jaunkadeda riamen de jilimen. ¹⁷ A ma a kan ron irail, ap kaireki momodijou, a ma a pil kan ron momodijou, ap wia kin i men liki o jaunopwei men. ¹⁸ Melel I indai on komail, me komail pan jalidi nin jappa, pan jalidi nanlan, o me komail pan lapwada nin jappa, pan lapwada nanlan. ¹⁹ I pil indai on komail, ma riamen nin jappa pan minimin pene ni meakot, me re men poeki, a pan pwai on ira jan Jam ai, me kotikot nanlan. ²⁰ Pwe waja kij, me riamen de jilimen pokon pena ni ad ai, i waja I kin mi nan pun arail. ²¹ Petruj ap kai don i potoan on: Main, pan pak depa i en makeki on ri ai ol o, me wia dip on ia? A itar ma a pan me ijepak? ²² Iejuj kotin majani on i: I indai on uk, kaidin ijepak eta, a pan pak iju wad ijejok. ²³ I me wein nanlan rajon nanmarki amen, me pan kapukapun na ladu kan. ²⁴ A ni a tapiada kapukapun, amen ap wijike don i, me pwaipwandeki talent nen. ²⁵ A ni jota a men pwain, a monjap ap majanier, me a pan netila, o a paud, o na jeri kan, o karoj, me a aneki, pwen pwainda. ²⁶ A ladu o ap poridi mo a poni, potoan on: Main kom kotin kanonama on ia, i pan pwain on komui karoj. ²⁷ A monjap

en ladu o ap pokela, ap lapwada o makeki *on i a pwaipwand*. ²⁸ A ladu ota ap koieila, diaradar kij a ladu amen, me pwaipwand *on i denar epuki; i ari koledi i, padik pena tapin wor a indada: Kapunala, ma om pwaipwand mia.* ²⁹ Ladu ap poridi mo a, poeki indada: Kom kotin kanonama *on ia, i pan pwain on komui.* ³⁰ A a *kan*, ap koieila, kajedi *on nan imaten lao a kapunala a pwaipwand.* ³¹ A kij a ladu kan lao kilaner me wiauier, rap mauk kaualap, koieila kaireki arail monjap karoj, me wiauier. ³² A monjap ap ekere don *i, majani on i: Koe meid ladu jueed amen!* I make ki *on uk er om pwaipwand karoj pweiki om poeki re i.* ³³ Menda koe jota kadek *on ri om ladu, duen i kin kadek on uk er?* ³⁴ A monjap ap makar kidar o *panalan i ren jaun kalokolok lao a kapunalar a pwaipwand karujuia.* ³⁵ Iduen Jam ai nanlan, pan pil wia *on komail, ma komail jota pan makeki jan nan monion omal on ri omal.*

19

¹ KADEKADEO Iejuj lao kaimwijokela padak pukat, ap kotila *jan Kalilää, koti don wein Iudää palilan Iordan.* ² O pokon kalaimun idauendo *i. I ari kotin kakelail ir adar waja o.* ³ Parijär akai ap kodo kajonejon *i indada: Me pun, ol en kajela a paud pweiki okotme?* ⁴ A ap kotin *japen majani: Komail jota doropwe, me i, me wia ir adar ni tapio, a kotin wiadar ol o li?* ⁵ A ap kotin *majani: I me aramaj amen pan pweidedi jam a in a pat on eta a paud; ira ari pan udukala eu;* ⁶ *Ira ari jolar riamen pwe uduk eu. Ari, me Kot kotin kapad penaer, aramaj depa kamueit pajan.* ⁷ *I rail ap*

indai on i: A da me Mojej majaniki, kijin likau en kamueit en koda, ol ap pan muei jan a paud? ⁸ A kotin majani on irail: Mojej mueid on komail er, en kajela omail paud akan pweki monion omail kapitakailar. A jan ni tapi o a jota kin due. ⁹ A nai indai on komail: meamen kajela a paud, ma jota pweki nene, ap paudekida amen; nan a kamal, o me pan paudeki, me lokidokilar o, a kin kamal. ¹⁰ Japwilim a tounpadak kan ap potoan on i: Ma iduen kujoned, me ol o en kapwaiadan a paud, a jota mau on papaud. ¹¹ A ap kotin majani on ir: Kaidin karoj, me pan kak weweki padak pot et, irail eta, me a muei on er. ¹² Pwe akai mia, me udan jotaunjok, a akai, me aramaj ki janer, a pil akai, me wia kapwat pweki wein nanlan. Meamen kak on weweki, i en weweki. ¹³ Kijin jeri kai ap wijike don i, pwen pwil po 'rail lim a kan o laolaoki, a tounpadak kan kapoui irail. ¹⁴ A Iejuj kotin majani: Mueid on kijin jeri kan, en ko don ia. Der kalik irail edi! Pwe iei jon en me udan wein nanlan. ¹⁵ I ari kotikida po 'rail lim a kan, ap kotila jan waja o. ¹⁶ O kilan, amen poto don i potoan on: Jaunpadak da me mau kot, i en wiada, pwe i en aneki maur joutuk? ¹⁷ A ap kotin majani on i: Menda koe idok re i duen me mau? Pwe amen ta me mau. A ma koe men ko on maur, dadaurata kujoned akan! ¹⁸ A ap potoan on: Kujoned da? A Iejuj kotin majani, iet akan: Koe der kamela aramaj; Koe der kamal; Koe der pirap; Koe der kadede likam; ¹⁹ Kakaki jam om o in om; o pok on men imp om dueta on pein uk. ²⁰ Manakap ap potoan on i: Mepukat karoj i kapwaiadar; a da me i en pil wia? ²¹ Iejuj kotin majani on i: Ma

koe menunjokela, u kowei, netikila om dipijou, ap kijakijaki *on* me jamama kan, koe ap pan aneki om pai nanlan, o kodo idauen ia do. ²² Manakap lao roner majan pot et, ap mamauk koieila, pwe a dipijou me toto. ²³ Iejuj ap kotin majani *on* jpwilim a tounpadak kan: Melel I indai *on* komail, meid apwal on me kapwapwa kan, en pedelon *on* nan wein nanlan. ²⁴ I pil katitiki *on* komail, me manai, kamel en tilon nan au en dikok eu, jan me kapwapwa en ko *on* nan wein Kot. ²⁵ Jpwilim a tounpadak kan lao ronadar met, ap puriamuiki kaualap indada: Ari, ij me pan kak kamaurela? ²⁶ Iejuj ap kotin jaupei won irail, ap kotin majani *on* irail: A jo kak pan aramaj, a ren Kot meakaroj me kak. ²⁷ Petruj ap jaben poto don i: Majani, kit likidmaliela meakaroj, ap idedauen komui, a da me pan katini kit? ²⁸ Iejuj ap kotin majani *on* irail: Melel I indai *on* komail, komail me idedauen ia do ni ipwi jopal, Nain aramaj lao mondi pon mole linan, komail pil pan mondi pon deun kadeik, kakaunda kainok en Ijrael eijokriau. ²⁹ O meamen kajela im a kan, de ri a ol o li akan, de jam a, de in a, de a paud, de jeri, de jap pweki ad ai, nan a pan ale pan pak epuki o jojoki maur joutuk. ³⁰ A me toto men moa, pan muri; a men muri pan moa.

20

¹ PWE wein nanlan rajon kaun pan im amen, me jankonai *on* raparapaki toundodok kai nan a mat en wain. ² Irail lao inauki pena, me denar eu ni ran eu, ap kadar ir ala nan a mat en wain. ³ A pil kotila ni auer kajilu, ap majani akai, me momod mal nan deun jaunet akan, ⁴ Ap majani *on* irail: Komail pil

kola nan mat en wain o, o meakot me pun, i pan pwain on komail; irail ari kola. ⁵ A pil kola ni auer kawonu o kaduau o wiadar dueta. ⁶ A pil kotila ni auer eijkeu, ap diaradar akai, me momod mal, ap majani on irail: Da me komail momodeki mal ran pon? ⁷ Irail potoan on: Aki jota amen, me kadokeki kit. Ap majani on irail: Komail pil kola nan mat en wain o, komail pan ale me pun. ⁸ A lao jautik penaer monjap en mat en wain majani on a jaunkoa: Kapokon pena toundodok kan o pwain on irail. Tapiada jan ren men pwand oko lao kokodo lel men madan kan, ⁹ Me kadodokier ni klok eijkeu kan ap kodo, amen amen ap ale denar eu. ¹⁰ A men maj akan lao kodo, rap kiki on, me re pan ale jiki jan, a re pil aleer denar ta ieu. ¹¹ Irail lao ale, rap lipaned on monjap o. ¹² Indada: Mepukat dodok auer ta ieu, a komui karajai kit pena; kit me dodokki apwal en ran o karakar en katipin. ¹³ A ap kotin japon majani on amen re 'rail: Kompoke pai, kaidin me japun, me i wiai on uk. Kita jota inauki pena denar eu? ¹⁴ Ale me om, kowei, i men pwain on me pwand pukat rajon uk. ¹⁵ De iaduen, a jota pun, i en wiaki me udan ai, me i mauki? De por en maj om me juepwe kadek? ¹⁶ Ari, me pwand akan pan moa, a me moa kan pan pwand, pwe me toto paeker, a me malaulau me piladar. ¹⁷ Iejuj lao kotin kodala Ierujalem, a kotin kelepe kila tounpadak ekriamen pon al a, majani on irail: ¹⁸ Kilan, kitail kin kodalan Ierujalem o Nain aramaj pan ko on ren jamero lapalap o jaunkawewe kan, o irail pan kadekada, en kamela i. ¹⁹ O re pan panala

i ren men liki kan, pwen kapikapiti i, o kaloke, o kalopuela, a ni ran kajilu a pan maureda. ²⁰ In en nain Jepedäuj ap poto don i, a na putak riamen ian i, poni i o poeki okotme re a. ²¹ A ap kotin majani on i: Da me koe mauki? A potoan on i: Re kotin mueid on ai tunol putak riamen, en mondi re ir, amen ni pali maun omui, amen ni pali main omui nan omui wei. ²² A Iejuj kotin jaben majani: Koma jota aja, me koma poeki. Koma kak nim dal me I pan nim? Ira potoan on: Je kak. ²³ A kotin majani on ira: Melel, komail pan tunole ai dal, a momod ni pali maun o main i, I jota kak mueid on, pwe pwaij en irail me a onop oner jan ren Jam ai. ²⁴ Ni en ek oko ar ronadar, ap juede kidar pirien o. ²⁵ A Iejuj kotin molipe ir do majani: Komail aja, duen jaupeidi en wei pokon ar kin poe irail edi, o me lapalap akan kin manaman on irail. ²⁶ A duen met a jota pan wiaui nan pun omail. A me men laud nan pun omail, en papa komail. ²⁷ O meamen re omail, me men jaumaj, i en lidui komail. ²⁸ Dueta Nain aramaj, me kaidin kodo, pwe aramaj en papa, a pwe i en papa o kida maur a wiliandi me toto. ²⁹ Ni arail kotila jan Ieriko, pokon kalaimun idauen la i. ³⁰ A kilan, ol majkun riamen momod ni kailan al o. Ni ara ronadar, me Iejuj kotin daulul, ira ap likelikwir indada: Main kupura kit, ir me japwilim en Dawid! ³¹ A pokon o kidau ira da, pwen nenenla. A ira kalaudela ara likelikwir indada: Main, kupura kit, ir me japwilim en Dawid! ³² Iejuj ari kotin udi, molipe ira do majani: Da me koma mauki, I en wiai on koma? ³³ Ira potoan on: Main, maj at en kapad

pajan! ³⁴ Iejuj ari kupuro kin ira dar o kotin jair maj ara. Maj ara ari madan pad pajaner; ira ap idauenla i.

21

¹ NI arail koren ion Ierujalem o lel on Petpake impan dol Oliwe, Iejuj ap kotin poronela tounpadak riamen. ² Majani on ira: Koma ko on nan kanim monen, a madan koma pan diar ejel amen, me jalidi, o na pul mi imp a, lapwa ira da, ap kare don ia! ³ A ma meamen pan indan koma meakot, koma pan indada: Kaun o men dake, i ari pan madan kadar ira do. ⁴ A mepukat karoj wiauier, pwen pwaida, me lokido ren jaukop o me majani: ⁵ Kaireki nain Jion jeripein: Kilan, om Nanmarki kotido re om. A kotin opampap o kaipokedi pon ejel li amen. ⁶ A tounpadak ko lao kolar, o wiadar duen Iejuj kotin majani on ira, ⁷ Ira ap wado ejel o na, ap irepadi po 'ra arail likau kan a ap kotin kaipokedi poa. ⁸ O pokon kalaimunia irepadi arail likau kan nani al o, a akai paledier ran tuka kan irepadi nani al o. ⁹ A pokon o, me tion moa, o me idauen, *nijinij* indada: Ojiana on japwilim en Dawid! Meid iajana me kotido ni mar en Kaun, ojiana nanlan. ¹⁰ A lao kotilon on nan Ierujalem, toun kanim ap mokimokid indada: Ij i? ¹¹ Pokon o katitiki: Nan i Iejuj, jaukop en Najaret en Kalilää. ¹² Iejuj ap kotilon on nan im en kaudok en Kot, ap kotin kaje jan karoj, me kin netinet nan im en kaudok, o kotin wukededi tepel en jaunkawilian moni ko, o deun men netin muroi. ¹³ O kotin majani on irail: A intinidi: Im ai pan adaneki im en kapakap, a komail wia kilar

deu en lipirap. ¹⁴ A me majkun o me jikil akan poto don i nan im en kaudok o; i ari kotin kakel irail adar. ¹⁵ A jamero lapalap o jaunkawewe kan lao kilaner manaman akan, me a kotin wiadar, o jeri kan nan im en kaudok, me *nijinij* indada: Ojiana on japwilim en Dawid! Irail ap makara kidar, ¹⁶ Indai on i: Kom jota mani, me mepukat katitiki? A Iejuj kotin majani on irail: Ei, komail jaikenta doropwe: Jan nan au en jeri o me kin kan didi, ir me kotin kapwaiadar kapin eu? ¹⁷ I ari kotin muei jan irail, kotila jan nan kanim o, koti don Petanien o pweiokidi waja o. ¹⁸ A ni manjan ni a kotin purlan kanim o, ap men konotedar: ¹⁹ A kotin majani tuka pik pot ni kailan al o, ap kotilan i. A jota, me a kotin diaradar, pwe ta eta, ap kotin majani on i: Koe jolar pan wa kokolata! A tuka pik ap madan monedier. ²⁰ Tounpadak kan lao kilaner, irail ap puriamui kidar indada: Daduen tuka pik o madan monelar. ²¹ A Iejuj kotin *japen* majani on irail: Melel I indai on komail, ma komail pojón, ap jota peikajal, kaidin met eta, me wiaui on tuka pik en, me komail pan kak wiada, pwe ma komail pan *indan* nana wet: Mokid wei lokidokila nan madau, nan a pan pwaida. ²² O meakaroj komail pan poeki ni omail kapakap, ap pojón komail pan ale. ²³ A lao kotilon on nan im en kaudok o, jamero lapalap akan o jaumaj en toun jap o ap ko don i ni a kotin kaukawewe indada: Manaman en ij, me komui wiaki mepukat? O ij me ki on komui manaman wet? ²⁴ A Iejuj kotin *japen* majani on irail: I pan pil kalelapok meakot re omail, ma komail pan *japen* ia, I pil pan *indan* komail manaman en ij, me I wiaki mepukat. ²⁵ En Ioanej a paptaij a tapi

jan ia? Men nanlan de me ren aramaj? Irail ap lamelame nan pun arail katiti, ma kitail pan inda men nanlan, a pan majani on kitail: Da me komail jo pojonki i? ²⁶ A ma kitail inda, me ren aramaj, kitail majak pokon o, pwe karoj kin wia jaukopki Ioanej, ²⁷ Irail ari japon Iejuj potoan on: Kit jota potoan. I ari pil majani on irail: Ijota pil pan indai on komail, manaman en ij, me I wiaki mepukat. ²⁸ A iaduen omail lamelam? Aramaj amen naineiki ol riamen. A kola ren amen indan i: Lao, kola ran wet dodok nan ai mat en wain. ²⁹ A japon indada: Ijota mauki; a mur ekij a kalukila, ap koieila. ³⁰ O a kola ren me teio indai on pil dueta. I me japon indada: Ei main; ap jota kola. ³¹ Ari, ij re 'ra, me wiadar injen en jam a? Irail potoan on i: Men maj o. Iejuj kotin majani on irail: Melel I indai on komail, jaunopwei o me neneck kan pan mo 'mail pedelon on nan wein Kot. ³² Pwe Ioanej pwara don komail, padapadak on komail duen al pun, a komail jota kamelele i; a jaunopwei o me neneck kan kamelele i. A komail lao kilaner, komail jota kalukila, pwen kamele i. ³³ Komail ron pil apot karajeraj! Kaun pan im amen padukedier mat en wain eu o kele pene, ap weiradar deun men wunid wan wain, o kauada im en daulik eu, ap kajile kin i on jaumat akai, o momaitelar nan wai. ³⁴ A lao anjau en rak, a kadaralan jaumat akan a ladu kai, pwen ale a wan wain. ³⁵ Jaumat akan ap jaikedi a ladu kan; re woki amen, kamela amen, a amen me re kate. ³⁶ A pil kadarala ladu kai, toto jan men maj, Irail ari wiai on irail pil dueta. ³⁷ A ikmuri a kadara won irail na ol majani: Nan re

pan majak nai ol. ³⁸ A jaumat akan lao kilaner ol o, irail ap kajokajoi nan pun arail: I me pan ale jojo, ukodo kitail en kamela i, a kitail pan id ale a jojo. ³⁹ Irail ari jaikedi i o kajapoke jan i nan mat en wain o, o kamela i. ⁴⁰ Ari, monjap en mat en wain lao pwarado, da me a pan wiai on jaumat pukat? ⁴¹ Irail fotoan on i: A pan kamela aramaj juepukat, ap pan neki on akai jaumat a mat en wain o, me pan ki on i wan wain ni anjau me kon on. ⁴² Iejuj ap kotin majani on irail: Komail jaikenta doropwer nan kijin likau kan: Takai o, me jauje kan kajapokelar, ap id wialar takai en pukakaim. Mepukat wiauier ren Kaun o, men kapuriamui patail? ⁴³ I me I indai on komail, wein Kot pan japadoke jan komail, ap ko on eu kainok, me pan kida wa. ⁴⁴ O meamen pupedi on pon takai wet, pan ola, a meamen me a pan pupedi on poa, a pan pitaki pajan i. ⁴⁵ A jamero lapalap o Parijär akan lao ronadar a karajeraj akan, re mulikiadar, me a kotin karajeraje kin irail. ⁴⁶ Irail ari majamajan jili en jaikidi i, a re majak aramaj akan, pwe re wia kin i jaukop amen.

22

¹ A IEJUJ kotin jaben o pil karajeraj on irail majani: ² Wein nanlan rajon nanmarki amen, me kamadipe na ol ni ran en a kapapaud. ³ O a kadarala na ladu kan, pwen luke don kamadip o, me kileledier akan; a re kan kodo. ⁴ A pil kadarala akai ladu majani: Kaireki me kileledier akan: Kilan, i kaonopadar ai kamadip o: nai kau ol o man wi kan me kamelar, o karoj nikier, ko don kamadip en kapapaud! ⁵ A irail jota injenoki, ap

kowei, amen nan jap we, o amen ko on dodok. ⁶ A me tei kan jaikidi a ladu kan kaloke o kame ir ala. ⁷ Nanmarki ap makara kidar, kadarala a jaunpei kan, kamela me lolap oko o ijikedar ar kanim o. ⁸ A ap indan a ladu kan: Ari, kamadip onoper, a me kileledier akan jota war on. ⁹ Komail ari kowei nan al akan, a karoj me komail diar, en kalua don kamadip o. ¹⁰ Ladu kan ap kola nani al akan, kapokon pena karoj, me irail diaradar, me jued o me mau kan; kamadip ari tounlar. ¹¹ A nanmarki lao pwarado, en kilan toun kamadip, ap diaradar aramaj amen, me jota a kapwat, ¹² A ap majani on i: Kompoke pai, iaduen om kak pedelon, pwe jota om kapwat? I ari japaimokid. ¹³ Nanmarki ap majani on papa kan: Jaliedi i pa o nä akan, ale o kajapokela nan rotorot liki iei wajan maiei o teterok. ¹⁴ Pwe me toto paekeredo, a me malaulau piladar. ¹⁵ Parijär ap pokon pena, kaparok pena duen ar pan kajapuna i jan a majan; ¹⁶ Irail ap kadaralan i nairail tounpadak kan ianaki ladun Erodej kan, potoan on: Jaunpadak, je aja, ir me kotin melel, o kotin kawewe melel duen al en Kot o re jota kotin kupuroki meamen, pwe re jota kotin kajampwaleki janjal en aramaj. ¹⁷ Ari, re kotin majani on kit kupur ar. Me pun, en nopwei on nanmarki de jo? ¹⁸ A Iejuj lao kotin mani ar me juet, ap majani: Malaun komail, da me komail kajonejon kin ia? ¹⁹ Kajale don ia moni en nopwei! Irail ap potoan on i denar eu. ²⁰ A kotin majani on irail: Mom en ij o intin wet? ²¹ Irail potoan on i: En nanmarki, a i kotin majani on irail: Ari, komail ki on nanmarki, me nain nanmarki, o on

Kot, me jpwilim en Kot. ²² Irail lao ronadar met, rap puriamuiki o muei jan i, o koieilar. ²³ Ran ota Jadujär akai ko don i, me kin inda, me dene me melar akan jolar pan maureda, ap kalelapok re a. ²⁴ Indada: Jaunpadak, Mojej majani, ma meamen melar ojota na jeri, ri a ol en id paudeki a paud, pwen kaipwi on ri a kadaudok a. ²⁵ Ari, pwin pirien eu mi re at, ol ijimen. Mejeni paudeki li amen, ap melar, a jota kadaudok a, ap kakaliki on ri a ol a paud; ²⁶ Pil dueta kariamen o kajilimen kokola lao kaijimen. ²⁷ A ikmuri li o pil melar. ²⁸ Ari; ni en me melar akan ar pan iajada, a pan en ij a paud ren me ijimen, pwe irail karoj me paudekidar i? ²⁹ A Iejuj kotin jaben majani on irail: Komail meid japon pwe komail jo weweki kijin likau kan de mana en Kot. ³⁰ Pwe me mau-redar akan jolar pan papaud de kapapaud, pwe irail dueta tounlan en Kot akan, me mimi nanlan. ³¹ Komail jaik doropwe duen en melar akan ar pan maureda, me lolok on komail jan ren Kot, me kotin majani: ³² Nai Kot en Apraam o en Ijaak o en Iakop? A kaidin Kot en me melar akan, pwe en me maur akan. ³³ A pokon o lao ronadar met, irail ap puriamuiki a padak. ³⁴ A Parijär akan lao ronadar, me a kotin kadukiedier Jadujär akan, ap pokon pena. ³⁵ Amen irail, jaunkawewe men, kajonejon i potoan on: ³⁶ Jaunpadak, kujoned da me lapalap nan kapun o? ³⁷ A Iejuj kotin majani on i: Koe en pokeki on Kot om Kaun monion om unjok, o nen om unjok, o om lamelam unjok. ³⁸ Iei met me moa en kujoned akan. ³⁹ O me kariau me dueta: Koe en pok on men imp om dueta on pein koe.

⁴⁰ Kujoned riau met me audepan kapun o jaukop akan. ⁴¹ Ni en Parijär akan ar momod pena, Iejuj ap kotin kainoma re 'rail. ⁴² Majani: Da me komail lamelame duen Krijtuj, nain ij i? Re fotoan on: Japwilim en Dawid. ⁴³ A kotin majani on irail: A iaduen da me Dawid kaadaneki i Kaun ren Nen ni a majani: ⁴⁴ Kaun o kotin majani on ai Kaun, mondi on ni pali maun i, lao I pan wia kida om imwintiti utipan nä om? ⁴⁵ A iaduen, ma Dawid kaadaneki i Kaun, a pil pan kak na ol? ⁴⁶ A jota amen, me kak japenki i meakot, o jolar me idok meakot re a kokolata.

23

¹ IEJUJ ap kotin kaparok on pokon o japwilim a tounpadak kan, ² Majani; Jaunkawewe o Parijär akan kin mondi nan deun Mojej. ³ Ari, karoj me re indan komail, i me komail en wia o kapwaiada, a der ale jan ar wiawia kan; pwe irail kin indada, ap jota kapwaiada. ⁴ Re kin pira pena kapwa en wijik me toutou melel, ap kidan pon apar en aramaj, a irail jota men jairki jondin pa arail. ⁵ O re kin kapwaiada ar wiawia kan karoj, pwe aramaj en ududial. Pwe irail kin kadälape ar kijin likau en kataman o kalaudela ni kailan ar likau. ⁶ Irail kin nonki mondi ni tapin tepel ni kamadip o, o leppandam nan jinakoke kan. ⁷ O re kin mauki, aramaj en ranamau on irail nan deun net, o aramaj en wia kin ir Rapi, Rapi, ⁸ A komail der nonki, aramaj en wia kin komail Rapi, pwe me ta men omail Jaunpadak, a komail pirien pena. ⁹ O komail der kaadaneki meamen jam nan jappa, pwe amen Jam omail, me kotikot nanlan.

10 O komail der *nonki*, aramaj en wia kin komail jaumaj, pwe me ta men omail Jaumaj: Krijtuj.

11 A me lapalap re omail, en omail papa. **12** Pwe me pan kajapwilada pein i, pan japwilidi, a me pan kajapwilidi pein i, pan kajapwilada. **13** Juedi on komail jaunkawewe o Parijär akan, malaun komail! Komail kin ritinidi wein nanlan mon aramaj akan, pwe komail jota pan pedelon, a me men pedelon, komail jota kin mueid on. **14** Juedi on komail jaunkawewe o Parijär akan, malaun komail! Komail me *nopur jan* im en li odi kan ap liliajooj kapakap reirei. Omail kalokolok pan laud melel. **15** Juedi on komail jaunkawewe o Parijär akan, malaun komail! Komail kin pidipidaki jed o jap, pwen wiada projelit amen, a lao wialar, komail ap pan wia kin i toun pweleko amen, me jueg jan komail. **16** Juedi on komail jaunkalua majkun, komail me kin inda: Meamen kin kaukila im en kaudok, dene jota katepa, a me kin kaukila kold en im en kaudok, i me pun. **17** Komail pweipwei o majkun, pwe da me kajampwal ren kold de im en kaudok o, me kin kajarauala kold? **18** O meamen kin kaukila pei jaraui, dene jota katepa, a me kaukila mairon, me mi poa dene i me pun, **19** Komail pweipwei o majkun, pwe da me kajampwal ren mairon de pei jaraui, me kin kajarauala mairon? **20** Ari, meamen kaukila pei jaraui, kin kaukila i o meakan, me mi poa. **21** O meamen kaukila im en kaudok, kin kaukila i ianaki i me kotikot lole. **22** O me kaukila nanlan, kin kaukila mol en Kot o me kin kaipokedi on poa. **23** Juedi on komail jaunkawewe o Parijär akan, malaun komail! Komail kin maironki eijokkij eu en minje,

o til, o kimel, ap jota injenoki kujoned en kapun
 kajampwal akan: Pun, o kadek, o pojona. Komail
 wiada mepukat, ap pil kapwaiada me tei kan!
²⁴ Jaunkalua majkun komail, me kin ijenoki kijin
 am en wel, ap katalala kamel! ²⁵ Juedi on komail
 jaunkawewe o Parijär akan, malaun komail! Pwe
 komail kin kamakelekel kajak o dal liki, a lol me
 dir en me re kuliada o me jued. ²⁶ Parijär majkun
 koe, kamakelekele maj lol en kajak o dal akan,
 pwe pali liki en pil makelekeleda! ²⁷ Juedi on ko-
 mail jaunkawewe o Parijär akan, malaun komail!
 Komail rajon joujou kan, me jementen, me kin
 janjal kajevel, a lole me dir en ti en me melar akan
 o jon en jaut karoj. ²⁸ I duen komail, me janjal
 pun mon aramaj, a lole komail me dir en malaun
 o japun. ²⁹ Juedi on komail jaunkawewe o Parijär
 akan, malaun komail! Pwe komail kin apapwali
 joujou en jaukop akan o kapwataki joujou en me
 pun kan. ³⁰ Ap inda: Ma kit mia ni muein jam atail
 akan, kit jota pan ian irail kamela jaukop akan.
³¹ Ari, pein komail kin kadede, me komail nain
 me kamelar jaukop akan. ³² A komail kaunjokala
 wiawia en jam omail akan! ³³ Komail jerpent o
 wan oter akan! Pala komail pan piti jan kadeik en
 nan pweleko? ³⁴ Kilan, i me I kadara don komail
 jaukop akai, o me lolekon kai, o jaunkawewe kai;
 a akai irail, me komail pan kamela, o kalopuela, o
 akai komail pan kaloke nan omail jinakoke kan, o
 komail pan paki irail jan nan eu kanim on nan eu.
³⁵ Pwen kapokon on komail nta makelekel karoj,
 me kapwilipwilidier nan jappa jan ntan Apel pun
 kokodo lel ntan Jakariaj, nain Parakiaj, me komail

kamelar nan pun en im en kaudok o pei jaraui. ³⁶ Melel I indai on komail, mepukat pan pwai on di wet. ³⁷ O Ierujalem, Ierujalem, me kin kamela jaukop akan o kate me pakadara don uk kan; pan pak toto, me I pan kapokon pena noumail akan, duen litok kin kompwal pena na purok kan pan pa a, a komail kan. ³⁸ Kilan, im omail pan tanla. ³⁹ Pwe I indai on komail, komail jolar pan kilan ia jan ni anjau wet, lao komail pan inda: Meid iajanai, me kotido ni mar en Kaun o!

24

¹ IEJUJ ap kotila kотиwei jan nan im en kaudok o, japwilim a tounpadak kan ari poto don i, pwen kajanale on i im en kaudok o. ² Iejuj ari kotin jaben majani on irail: Komail jo ududial mepukat karoj? Melel I indai on komail, jota eu takai pan mimi pon eu, me jota pan karonk pajan. ³ Ni a kotin kaipokedi pon dol Oliwe, tounpadak kan kelep poto don i potoan on: Re kotin majan don kit anjau da, me mepukat pan pwaida o da kilel pan ar pan kotin puredo, o imwin kaua? ⁴ Iejuj ari kotin jaben majani on irail: Kalaka, pwe jota amen en kotaue komail. ⁵ Pwe me toto pan kodo ni ad ai katiti: Nai me Krijtuj o kotaue me toto. ⁶ Komail pan ronada duen mauin o kajokajoi pan mauin; Komail kalake, der majak; pwe mepukat pan wiaui maj, a imwi jaikenta mia. ⁷ Pwe eu jap pan u on eu, o eu wei on eu; o anjaun lek, o kilitop, o rerer en jap akai pan wiaui. ⁸ Mepukat karoj tapin kalokolok. ⁹ Irail ap pan pan komail lan kamakam o kame komail la; o komail pan tantat pan kainok karoj pweki ad ai. ¹⁰ Me toto

ap pan makarada, o amen pan panala amen, o re pan tataki nan pun arail. ¹¹ O jaukop likam toto pan pwarada o kotaue me toto. ¹² A limpok en me toto pan laula, aki japon, me pan pwaida kaualap. ¹³ A me pan dadaurata lel imwi, i pan dorela. ¹⁴ A ronamau en wei o pan kalok jili nan jappa karoj, pwen kadede on wei karoj, iei anjau, me imwi korendo. ¹⁵ A komail lao kilan jaut akan, o ola laud mi nan waja jaraui, duen me jaukop Daniel kopadar, meamen doropwe, i en weweki. ¹⁶ Me kin mi nan jap en Iudää, ap tanala pon nana; ¹⁷ O me mi pon im, ender ko on lole, pwen ale a kapwa jan; ¹⁸ O me mimi nan jap, ender puron ale a likau. ¹⁹ O me juedi on irail me lijean o me kin kadidi ni ran oko! ²⁰ Komail ari kapakap, pwe komail depa pitila ni anjaun kapau, o pil der ni ran en japat. ²¹ Pwe i anjaun kamakam kaualap, jota me dueta jan ni tapin kaua kokodo lel met, pil jota pan wiaui kokolata. ²² O ma ran oko jo kamalaulau la, jota uduk eu me pan dorela; a pweki me piladar akan ran oko pan kamalaulaula. ²³ O ma meamen pan indan komail: Kilan iet Krijtuj de monen, komail der kamelele. ²⁴ Pwe Krijtuj likam kai o jaukop likam kai pan pwarada, o kapwareda kilel o manaman akan, pwen pil kotaueda me piladar akan, ma re kak on. ²⁵ Kilan, nai me kop on komail er. ²⁶ Ari, ma re pan katiti on komail: Kilan, a kotikot nan jap tan o, der koieila; kilan, a kotikot waja rir o, der kamelele. ²⁷ Pwe duen liol a tapida jan ni maj en lan linanla lel kapin lan, iduen en Nain aramaj a pan pwarado. ²⁸ Pwe waja man melar mia ia, i waja ikel pan

pokon pena ia. ²⁹ A murin kamakam o katipin pan madan rotorotala o maram pan jolar linan, o uju kan pan moredi jan nanlan, o katen pan nanlan pan mokidada. ³⁰ Kadapakilene pan Nain aramaj ap pan pwarada nanlan, o kainok karoj en jappa ap pan mamaiei, o irail pan kilan Nain aramaj a kokido dapok en lan akan, me manaman o linan kaualap. ³¹ O a pan kadarala na tounlan kan peuk pojaune lapalap, re pan kapokon pena na me piladar akan jan pali paieu, jan ni maj en lan lel on kapi. ³² Jan ni tuka pik o komail padakki karajeraj en: Ra kan lao pileñ o ta pwarada, komail ajaki, me rak korendor. ³³ Pil dueta komail, komail lao diar mepukat, en aja, me a korendor, a leler liman wanim. ³⁴ Melel I indai on komail, di wet iota pan mela, lao mepukat karoj pan pwaida. ³⁵ Lan o jappa pan poula, a ai padak iota pan poula. ³⁶ A duen ran o auer iota amen, me aja, pil tounlan kan jaja. Jam ai ta me mani. ³⁷ A duen ni muein Noa iduen en Nain aramaj a pan pwarado. ³⁸ Pwe duen ni ran akan mon nolik lapalap re mana o nim, re papaud o kapapaud, lao lel ran en Noa a pedelon on nan warim o. ³⁹ O re iota dedeki lao lel nolik pwaida o kamop ir ala karoj, iduen en Nain aramaj a pan pwarado. ⁴⁰ I ran o riamen pan mi nan jap; amen pan peuka jan o amen luadi. ⁴¹ Riamen pan irij nan im en plaua, amen pan peuka jan a amen luadi. ⁴² Komail ari majamajan, pwe komail jaja auer, me omail Kaun pan pwarado. ⁴³ A met komail en aja, ma jaumaj en im o ajaer auer en men lipirap pan kodo, a pan majamajan, a iota pan mueid on kawela im a.

⁴⁴ Komail ari pil majamajan, pwe Nain aramaj pan kodo ni auer, me komail jota lamelame. ⁴⁵ Ari, ij ladu lelapok o lolekon o, me a monjap kajapwilada pon im a, pwen nene on irail ni anjau me kon on. ⁴⁶ Ladu o meid pai, me a monjap pwara diarada i a wiawia due met! ⁴⁷ Melel I indai on komail, a pan kajapwilada i pon a dipijou karoj. ⁴⁸ A ma ladu juev o pan lamelame nan monion i: Ai monjap pwapwand kodo; ⁴⁹ Ap kame a warok kan o nam o nim nan pun en me kamom jakau; ⁵⁰ Monjap en ladu o ap pan pwarado ni ran eu, me a jota lamelame o ni klok, me a jaja. ⁵¹ O a pan palan pajan i o katororalan i ren me malaun akan, iei wajan maiei o teterok.

25

¹ I ANJAU o wein nanlan me rajon li ek, me ale ar lamp akan, ap koieilan ol kamod. ² Me limen me lolekon a me limen me lolepon. ³ Me lolepon oko wa ar lamp akan ap jota ianaki kadirepa. ⁴ A me lolekon ko wa ar lamp akan ianaki kadirepa. ⁵ A ni en ol kamod a pwapwand ir karoj men mair ap mairelar. ⁶ A lao nan lukepan pon a lok jili: Kilan, ol kamod kotido, komail koieilan i! ⁷ Li karoj ap pauridar kaonopadar ar lamp akan. ⁸ Me lolopon ap indan me lolekon kan: Komail ki don kit kijan omail le, pwe nait lamp akan pan kunla. ⁹ A me lolekon kan jaben indada: O iermen, pwe ede jola itar on kit o komail, komail kola ren jaunet netiada pein omail. ¹⁰ Ni arail kokolan net, ol kamod ap jamador. Irail me onoper ian i pedelon on nan kamadip o, wanim ap ritidier. ¹¹ Murin anjau kij li tei ko ap pwarado indada: Main, main, re kotin

ritinadan kit! ¹² A ap jaben indada: Melel i indan komail, i jaja komail. ¹³ Komail ari majamajan, pwe komail jaja ran de auer. ¹⁴ Pwe a rajon aramaj amen, me pan momaitela nan wai. Ap kapokon pena na ladu kan o nek on irail a dipijou kan. ¹⁵ A ki on amen talent limau, a on amen riau, a on amen eu, duen me re itar on, a ap madan jamar. ¹⁶ Me aleer talent limau, ap koieila dodokki o diaradar pil talent limau. ¹⁷ A me aleer riau, pil dueta, a diaradar pil riau. ¹⁸ A me aleer eu, ap koieilar jarepedier nani pwel, okilar moni en monjap o. ¹⁹ A kadekadeo a warailar monjap en ladu pukat ap puredo o kainene irail adar. ²⁰ Me aleer talent limau ap potodo wado pil talent limau indada: Main komui kotiki on ia er talent limau, kom kotin majani, iet pil talent limau, me i netia kidar. ²¹ A monjap ap indan i: Meid mau, me koe wiadar, ladu lelapok o melel amen koe. Koe apapwali mau me tikitik o, i ap pan kajapwiladan uk pon dipijou toto, ko on nan peren en om monjap! ²² A me aleer talent riau ap pil potodo indada: Main komui kotiki don ia er talent riau, kom kotin majani, iet pil talent riau, me i netia kidar. ²³ A monjap ap indant i: Meid mau, me koe wiadar, ladu lelapok o melel amen koe. Koe apapwali mau me tikitik o, i ap pan kajapwiladan uk pon dipijou toto ko on nan peren en om monjap! ²⁴ A me aleer talent eu ap pil potodo indada: Main, i ajaer komui, me komui ol padik amen, me kin dolun jan waja, me kaidin komui padukedier ia, o nak pena, waja me kaidin komui kamorok ia; ²⁵ Nai ari majak, o koieila o okilar japwilim omui talent nani pwel, majani, iet japwilim omui. ²⁶ A monjap

ap jaben indan i: Ladu jueg o ponkake men koe, ma koe ajaer, me i kin dolun waja, me kaidin nai padukedier, o nak pena waja, me kaidin nai kamorokier. ²⁷ Menda koe jota ki on jaun kawilian moni nai moni, a nai lao puredo, i ap pan ale me udan ai ianaki moni me a naitikadar. ²⁸ Komail ari ki jan re a a talent, ap ki on, me a talent ejok. ²⁹ Pwe me a mia, ekij pan ko on, pwen aneki me laud; a me jota a mia, nan a pan katia jan me mi re a. ³⁰ A ladu me jota katepa, komail kajela nan rotorot liki, iei wajan maiei o teterok. ³¹ A Nain aramaj lao kodo ni a linan, o tounlan jaraui kan ian i, a pan mondi pon mol en a linan; ³² O toun jappa karoj pan kapokon pena mo a. A ap pan katoror irail pajan dueta jilepa o kin katorore jip ol ren li akan. ³³ A pan kila na jip li akan ni pali maun, o na jip ol akan ni pali main. ³⁴ Nanmarki ap pan majani on toun pali maun: Ukodo, komail kompoke pan Jam ai, jojoki wei o, me onop on komail er jan ni tapin kaua! ³⁵ Pwe nai men manadar, a komail ap kamana ia; nai men nim piladar, a komail ap kanim pil ia; nai men kairu men, a komail ap kajamo ia. ³⁶ Kilijo, a komail ap kalikauwi ia dar, nai jomaudar, a komail ap pwara don ia; nai jalidier, a komail ap pwara don ia. ³⁷ Me pun kan ap pan jaben i potoan on: Main, iad me je potoan ir men konot, ap potoan don ir konot, de men konot pil, ap id konote don ir? ³⁸ Iad kit potoan ir men kairu, ap kajamo ir? De kilijo, ap kalikauwi ir adar? ³⁹ Iad kit potoan ir lomum, de jalidi, ap poto don ir? ⁴⁰ Nanmarki ap pan jaben majani on irail: Melel i indai on komail, meakot

komail wiai *on* amen, ri ai ol tikitik pukat, i me komail wiai *on* ia er. ⁴¹ A ap pil pan indan irail toun pali main: Komail me riala, kowei jan ia, ko on nan kijiniai joutuk, me onoper *on* tewil o nal kan. ⁴² Pwe nai men manadar, a komail jota kamana ia, o men nim piladar, a komail jota kanim pil ia, ⁴³ Nai men kairu men, a komail jota kajamo ia, kilijo, a komail jota kalikauwi ia dar, o jomau, o jalidi, a komail jota pwara don ia. ⁴⁴ Irail ap pil pan potoan *on*: Main, iad me je potoan ir men konot, de men konot pil, de men kairu men, de kilijo, de lomum, de jalidi, ap jota papa *on* ir? ⁴⁵ A ap pan jaben irail majani: Melel i indai *on* komail, meakot komail jota wiai *on* amen tikitik pukat, i me komail jota wiai *on* ia. ⁴⁶ Mepukat ap pan kolan kalokolok joutuk, a me pun kan pan maur joutuk.

26

¹ KADEKADEO Iejuj lao kaimwijokela padak pukat karoj, ap kotin majani *on* japwilim a tounpadak kan: ² Komail aja, pon ria pon paja pan wiaui o Nain aramaj pan panala, en kalopula. ³ Jamero lapalap akan o jaumaj akan en toun jap o ap pokon pena nan im *en* jamero lapalap, me maraneki Kaipaj. ⁴ O kapukapun pena duen ar pan widinadi Iejuj en kamatala. ⁵ A irail inda: Iermen ni ran en kamadip, pwe aramaj ede moromoronada. ⁶ Iejuj lao kotikot Petaniem nan im *en* Jimon tuketuk, ⁷ Li amen ap poto don i, wa kijin potel alapajta audaud en men kei kajampwalia ap kieledier *on* pon kadokenmai, ni a kotin konot. ⁸ A tounpadak kan lao kilaner, ap juede kidar indada: Menda kei wet olar mal? ⁹ Pwe a pan netila,

kareda pwai laud ap nek *on jamama kan*. ¹⁰ Iejuj lao mani met, ap kotin majani *on irail*: Da me komail kainjenjuedeki li o? Pwe me mau, me a wiai *on ia er*. ¹¹ Pwe me jamama kan kin mi re omai anjau karoj, a *nai* jota anjau karoj. ¹² Pwe ni a wudok kidi pil wet pon war ai, a kaonopadar ai jaredi. ¹³ Melel I indai *on komail*, waja karoj, me ronamau wet pan kalok ia, panada jappa pon, me a wiaer et, pil pan kaloki, pwen katamanpa. ¹⁴ Amen ekriamen, me adaneki Iudaj Ijkariot, ap koieila ren jamero lapalap akan, ¹⁵ Indada: Da me komail pan ki don ia, i pan pana don komail i? Irail ari inauki *on i jip en moni jileijok*. ¹⁶ A jan ni anjau o a jojon duen a pan manai *on en panala i*. ¹⁷ Ni ran kaieu en prot jomut tounpadak kan poto don Iejuj patoan *on*: Ia waja re kotin kupura, jen kaonopadan ir kamadip en paja? ¹⁸ A kotin majani: Kola nan kanim ren ol amen indai *on i*: Jaunpadak o majani: Ai anjau korendor, I pan wiada kamadip en paja re om, o ai tounpadak kan pan *ian ia*. ¹⁹ Tounpadak kan ap wiadar duen majan en Iejuj, kaonopadar paja. ²⁰ A lao jautik penaer, a kaipokedi ni tepel, a ekriamen akan *ian i*. ²¹ Ni arail konokonot, a kotin majani: Melel I indai *on komail*, amen komail pan *pan ia la*. ²² Irail ap injenjued o amen amen potoan *on i indada*: Main *nai i?* ²³ A kotin jaben majani: Me *ian ia kaduedi* nan dal o, i me pan *pan ia la*. ²⁴ Pwe Nain aramaj pan kokola duen a intinidier. A juedi *on aramaj o*, me Nain aramaj *panala re a*, me mau *on aramaj o*, ma a jota ipwidier. ²⁵ A Iudaj, me *panala i* ap *jaben potoan on indada*: Rapi, *nai i?* A kotin

majani on i: Koe me indada. ²⁶ Ni arail wiadar konot. Iejuj kotin limadar prot laolaoki, o pilitiki pajan, kotiki on toupadak kan majani: Ale tunole, war ai metet. ²⁷ A pil kotikida dal o laolaoki kotiki on irail majani: Komail karoj nim jan; ²⁸ Pwe nt' ai metet, udan inau kap, me pan kapwiliipwilidi on me toto, men lapwada dip. ²⁹ A I indai on komail, me I jolar pan nim jan wan wain jan anjau wet lao lei ni ran o, me I pan pil nim nan wein Jam ai ianaki komail! ³⁰ Irail lao melkakaki melkaka en kapin, rap kotila pon dol Oliwe. ³¹ Iejuj ap kotin majani on irail: Komail karoj pan makar kin ia ponpon wet, pwe a intinidier: I pan kame jilepa o, a pwin jip o pan more pajan. ³² A murin ai maureda, I pan ti on mo 'mail kola Kalilää. ³³ A Petruj jaben potoan on i: Ma karoj pan makar kin ir a nai jota pan makar. ³⁴ Iejuj kotin majani on i: Melel I indai on uk, ponpon wet mon malek a kakorot, koe pan kamam kin ia pan jilepak. ³⁵ Petruj potoan on i: Ma i ian ir matala, i jota pan man kamam kin ir; iduen en tounpadak kan karoj ar indinda. ³⁶ Iejuj ap kotilan waja o me adaneki Ketjemane, a irail ian i, ap kotin majani on tounpadak kan: Komail mondi met, lao I pan kola kapakap monen. ³⁷ O a kotin ukadar Petruj o nain Jepedäuj ol riamen, ap kotin tapiadar kupur olar o patau kaualap. ³⁸ Iejuj ap kotin majani on irail: Nen i ap injenjuedelar kaualap on mela. Komail pan mimieta met, ian ia majamajan. ³⁹ O a kotila ekij waja, ap kotin pupekidi jilan i laolaoki majani: Jam ai, ma a kak, kom kotiki jan ia dal wet; ari jo, kaidin nai, komui ta en wiawia. ⁴⁰ I ari kotin pure don tounpadak kan, diar ir adar mamair, ap kotin majani on

Petruj: Komail jo kak ian ia majamajan auer ta ieu? ⁴¹ Majamajan o kapakap, pwe komail de ko on nan jonejon. Nen me peik, a uduk me luet. ⁴² A pil kotila kariapak laolaoki majani: Jam ai, omui kupur eta, me dal wet jota kak kowei jan ia, ari I pan tunole. ⁴³ A lao kotin puredo diar ir adar pil mamair, pwe maj arail me toutou. ⁴⁴ A a kotin muei jan irail, pil kotilar laolaoki kajilepak ni majan ota. ⁴⁵ Ap kotin pure don tounpadak kan majani on irail: Komail ari mamair o kamol. Kilan, auer leler, me Nain aramaj pan panalan pa en me dipan akan. ⁴⁶ Paurida, kitail en kola, kilan, a jamador, me pan pan ia la. ⁴⁷ Ni a kotin mamajandar, kilan, Iudaj, amen ir ekriamen oko, pwarador, pokon lapalap ian i, me wa kodlaj o jokon jan ren jamero lapalap akan o jaumaj akan en toun jap o. ⁴⁸ Men panala i ki on ir kilel eu indada: Me I pan metik, iei I komail pan koledi. ⁴⁹ I ap madan don Iejui indada: Pon mau Rapi ap metik i. ⁵⁰ A Iejuj kotin majani on i: Kompoke pai, menda koe pwarador? Irail ap por on Iejuj, jaikidi i. ⁵¹ A kilan, amen irail, me ian Iejuj, kapawei pa a, ujadar na kodlaj, pale jan jalon en ladu en jamero lapalap o. ⁵² Iejuj ap kotin majani on i: Kapure ion om kodlaj nan deu a! Pwe karoj, me ale kodlaj, pan kamekila kodlaj. ⁵³ De koe lamelame, me I jota kak poeki ren Jam ai en kadara don ia tounlan toto jan lekion eijokriau jama; ⁵⁴ A iaduen kijin likau kak pwaida? A udan a pan wiaui duen met. ⁵⁵ Ni auer ota Iejuj kotin majani on pokon o: Da, nai lolap amen, me komail kodon aleki kodlaj o jokon akan? Ni ran akan karoj I mier re omail,

kauwewe nan im en kaudok, a komail jota kol ia dier. ⁵⁶ A mepukat karoj wiauier, pwe kijin likau en jaukop akan en pwaida. Tounpadak kan karoj ap muei jan i tandaui. ⁵⁷ A me jaikidier Iejuj, ap kaluan i ren jamero lapalap Kaipaj, waja jaunkawewe o jaumaj akan pokon pena ia. ⁵⁸ A Petruj idauendo i doowei jan lel tanpaj en jamero lapalap o pedelon on mondi ren papa kan, pwen kilan imwin mepukat. ⁵⁹ A jamero lapalap akan, o jaumaj akan, o pwin en kapun o roporop kadede likam on Iejuj, pwen kamatala; ⁶⁰ Ari, jota me irail diar. Jaunkadede likam me toto, me pwarado, ari jo, jota me irail diar. Ikmuri jaunkadede riamen pwarado, ⁶¹ Indada: Lap en me inda: I kak on kawela im en kaudok en Kot ap id kauada ni pon jili pon. ⁶² Jamero lapalap ap kajinenda majani on i: Kom jota jabenki meakot, me mepukat kin kadede on komui? ⁶³ A Iejuj kotin nenenlata. Jamero lapalap ap majani on i: I kakau kin komui la ren Kot ieiadj, komui en indan kit, ma komui Krijtuj Japwilim en Kot. ⁶⁴ Iejuj ap kotin majani on i: Komui me inda. A I pil men kaire kin komail, jan ni anjau wet, komail pan kilan Nain aramaj a pan kaipokedi ni pali maun en manaman o kokido dapok en lan akan. ⁶⁵ Jamero lapalap ap ter pajan, a likau kan indada: A lalaue. Menda pil akai jaunkadede? Kilan, komail apton ronadar a lalaue, ⁶⁶ Da me komail lamelame? Irail jaben fotoan on: A mau on kamela. ⁶⁷ Irail ap kondipi on jilan i o pakir i, o akai pikir i ni jilan i, ⁶⁸ Indada: Krijtuj, kokop on kit, ij me pikir uk? ⁶⁹ Petruj momod liki panakepir; lidu men ap ko don i in-

dada: Koe me pil ian Iejuj en Kalilää. ⁷⁰ A i me kamamaki mo 'rail karoj indada: I poneponeki me koe inda. ⁷¹ A ni a pedoi wei jan nan wanim, amen lidu ap kilan i indan irail, me mi waja o: Lap men et me pil ian Iejuj en Najaret. ⁷² A pil kamamki ap kaula: I jaja aramaj en. ⁷³ Mur ekij irail me u impa pil kaido indan Petruj: Melel koe amen irail, pwe nil om kadiarok kin uk ada. ⁷⁴ I ap lalaue o kaula indada: I jaja aramaj en. Malek ap kakorot. ⁷⁵ Petruj ap tamanda majan en Iejuj, me kotin majani on i: Mon malek a kakorot, koe pan kamam kin ia pan jilepak. A ap koieila janejan laud.

27

¹ A LAO ran pajaner, jamero lapalap akan o jaumaj akan en toun jap o kapukapunada duen Iejuj pwen kamatala. ² Irail lao jaliedi i, ap wawei, ki on ren kopina Pontiuj Pilatuj. ³ A Iudaj, me panala i lao kilaner me a pakadeikadar, en kamatala, ap kalukila o purekido moni jileijok ren jamero lapalap akan o jaumaj akan. ⁴ Indada: Nai me wiadar dip, ni ai panalar nta makelekel. A irail inda: Menda re at? Koe en pein wia. ⁵ I ari kajedi moni ko nan im en kaudok, ap koieilar lujiamaalar. ⁶ A jamero lapalap akan ale moni ko indada; A jota pun kitail en ki on nan deun mairon, pwe pwain pan nta. ⁷ Irail ari kapukapun, ap netiadar jap en jaun wia dal, waja me men liki pan jeredi ia, ⁸ I me waja o adaneki jap en nta kokodo lel ran wet. ⁹ I dokan a pwaidar, me lokidor ren jaukop Ieremia, me majani: Irail ari aleer moni jileijok i pwaine pan i, me re netiada ren men Ijrael. ¹⁰ O

pwaine kida jap en jaun wia dal, duen me Kaun o
 kotin majani *on ia*. ¹¹ Iejuj ari kotikot mon kopina;
 kopina ap kainoma re a majani: Nanmarki en Juj
 akan komui? A Iejuj kotin majani *on i*: Komui
 me majani. ¹² Jamero lapalap akan o jaumaj akan
 lao karaune kin *i*, a jota kotin jaben. ¹³ Pilatuj ap
 majani *on i*: Komui jota ron duen ar karakarauni
 komui kaualap? ¹⁴ I ari jota kotin majani *on i*
 meakot. Kopina ap poneponeki kaualap. ¹⁵ Ari,
 ni kamadip o kopina kin lapwa *on irail amen* me
 jalidi, meamen, me re mauki, ¹⁶ A *i anjau o ol*
 amen, ad a Parapaj, me jalidi re 'rail. ¹⁷ Irail lao
 pokon penaer, Pilatuj ap majani *on irail*: Ij me
 komail mauki, *i en lapwa dan komail*, Parapaj de
 Iejuj, me maraneki Krijtuj? ¹⁸ Pwe a ajaer, ar
 peirin, me re pan kilar *i*. ¹⁹ A lao kaipokedi pon
 deun kadeik, a paud ilokilan *i indada*: Komui der
 wia meakot *on ol pun men et*, pwe i auramandar
 duen *i*, me i lokelokeki laud ran wet. ²⁰ A jamero
 lapalap akan o jaumaj akan jairen kila pokon o, ar
 poekipoeki Parapaj o kamatala Iejuj. ²¹ A kopina
 jaben majani *on irail*: Ij re 'ra, me komail mauki,
i en lapwadan komail? Irail potoan *on*: Parapaj.
²² Pilatuj ap majani *on irail*: Da me *i en wiaki*
 Iejuj, me maraneki Krijtuj? Irail karoj potoan *on*:
 A *en kalopuela!* ²³ A kopina majani: Pwe jue
 da, me a wiadar? A re kalaudela ar weriwer: A
 pan kalopuela! ²⁴ Pilatuj lao kilan, me a jota kak
 wiada meakot, pwe moromoron pan wiaui, ap ale
 pil, omiom mo 'rail majani: *Nai makelekel jan*
 ntan ol pun men et, komail pan wia. ²⁵ Aramaj
 karoj ap wiaki eu jaben *indada*: Nta en kapokon

on kit o nait jeri kan! ²⁶ A ap lapwa don irail Parapaj, a Iejuj me a woki ap mueid on irail, en kalopuela i. ²⁷ Nain kopina jaunpei kan ap ale Iejuj kalualon on nan im en kadeik o, ap kapokon pena jaunpei karoj; ²⁸ Irail ap ki jan i japwilim a likau kan, ap id kalikauwie kida i likau waitata; ²⁹ Ap pada al en tek eu, ap kida pon kadokenmai, o ki on jokon apot ni lim a maun, o kelepukidi mo a o kapikapidi i indada: Ion Nanmarki en Juj akan! ³⁰ Irail kondipe on i, o re ale jokon o, o pokieki kadokenmai. ³¹ Irail lao kapiti i, ap kijan likau waitata, ap kapure on i udan japwilim a likau o kaluawei, pwen kalopuela. ³² Ni arail kotikot kokola, rap diarada aramaj en Kirene men, me ad a Jimon, i me re iton on, en wadala japwelim a lopu. ³³ Irail lao lel on waja o, me ad a Kolkata, iet wewe: Waja en pondal en mona. ³⁴ Irail ki on i pinika, me doleki edi. A lao kotin jon kij, a jota urak. ³⁵ Irail lao kalopuelar i, ap nek pajan japwilim a likau kadoropwe kidar. ³⁶ Irail ari mondi on waja o majamajan i. ³⁷ O ponanin kadokenmai re pajuredier intin o, me a pukoki: Iet Nanmarki en Juj akan. ³⁸ Lolap riamen ian i lopuelar, amen mi ni pali maun, a amen ni pali main. ³⁹ Me dadaulul akan lalaue i, dueduällok. ⁴⁰ Katiti: Koe me kin kawela im en kaudok ap id kauada pon jili pon, en pein dore uk ala; ma Japwilim en Kot koe, en keredi jan nin lopu en! ⁴¹ A jamero lapalap, o jaunkawewe, o jaumaj akan pil dueta kapikapiti i indada: ⁴² A dorelar akai, ap jota kak dorela pein i; ma i Nanmarki en Ijrael, i en keredi jan ni lopu en, a kitail pan kamelele i. ⁴³ A liki Kot, i en kotin

dorela, ma a kotin kupura i, pwe a indada: Nai Japwilim en Kot. ⁴⁴ Lolap oko, me ian i lopuelar, pil lalaue i. ⁴⁵ Jan ni auer kawonu lel auer kaduau rotorot kipadi jap o. ⁴⁶ Ni auer kaduau Iejuj ap kotin *nil laud* majani: Eli, eli lama ajaptani! Iet wewe: Ai Kot, ai Kot, da me komui likitmalia kin ia la? ⁴⁷ Akai me u waja o, ronadar me, ap indada: A eker Eliaj. ⁴⁸ A amen irail pitipit tan ale lim eu, kaduedi on nan pinika kauon ni alek apot, kidan i en urak. ⁴⁹ A akai me inda: Iermen, kitail en kilan maj, ma Eliaj pan pwarado dorela i. ⁵⁰ Iejuj pil kotin *nil laud*, ap kadarala *nen e*. ⁵¹ A kilan, perepa likau en im en kaudok o ap dei pajan, jan pali poa lel pa, o jap rereda, o paip akai ronkilar, ⁵² O joujou kai jara pajan, o war en me jaraui kan toto, me mamair, ap iajadar. ⁵³ O murin ar iajadar, irail koda *jan* nan joujou kan, kolan kanim jaraui, pwara *don* me toto. ⁵⁴ Jenturion o me ian i jinjila Iejuj, kilaner jap a rereda, o meakan, me wiauier, rap majakadar kaualap, katiti: Melel i, me Japwilim en Kot! ⁵⁵ O li toto mi kailewei, kilekilan me wiaui, iei irail, me idauendo Iejuj jan Kalilää papa i. ⁵⁶ Maria men Makdala, o Maria in en Iakopuj i Iojej, o in en nain Jepedäuj akan mi nan pun arail. ⁵⁷ A lao jautik penaer, ol kapwapwa men pwarado, men Arimatia, me ad a Iojep, me pil tounpadak en Iejuj amen. ⁵⁸ I ari poto don Pilatuj poeki kalep en Iejuj. Pilatuj ap majani, a en *panalan* i. ⁵⁹ Iojep ari ale kalep o, kidimiki pena likau makelekel o kajelel; ⁶⁰ Ap nekidedi nan pein a joujou kap, me a weiradar nan paip; i ap kadapure on takai kalaimun eu nan au en joujou

o, ap kotila jan, ⁶¹ A Maria men Makdala, o Maria teio momod jal on joujou o. ⁶² A mandan ran o, ran en kaonop, jamero lapalap o Parijär akan pokon pena ren Pilatuj. ⁶³ Indada: Main, kit tamandar, me ol jueed men et katitiki ni a memaur: I pan maureda murin ran jilu. ⁶⁴ Komui ari majani, me ren jinjila joujou o lel ran kajilu, pwe a tounpadak kan de kodo pirapela, ap indan aramaj: A kotin iajadar jan ren me melar akan, pwe pakotau wet pan jueed jan men maj, ⁶⁵ Pilatuj majani on irail: let jilepa ko, komail kowei jinjila joujou o duen komail kak on. ⁶⁶ Irail ari koieila, kileledier takai o, o kajilaki joujou o jaunpei kai.

28

¹ RAN en japat lao daulier, ni manjan en at en wik, Maria men Makdala, o Maria teio ap kodon ududial joujou o. ² A kilan, jap rereda kaualap, pwe tounlan en Kaun amen, pwaradido jan nanlan o katapur jan takai o, ap kaipokedi on poa, ³ Mom a dueta liol o a likau puetepueteta jno. ⁴ Jilepa ko ap majapwekadjar, o re likamata mela. ⁵ A tounlan o kotin jaben majani on li oko: Komail der majak pwe i aja, me koma rapaki Iejuj, me lopuelar. ⁶ A joer met, pwe a iajadar, duen a kotin majanier. Kodo udial waja, me Kaun nekinekidi maj o, ⁷ O tanwei kaireki japwilim a tounpadak kan, me a kotin iajadar jan ren me melar akan. A kilan a pan kotin tion mo 'mail kotilan Kalilää. I waja komail pan diarada i. Kilan, i kop on komail er. ⁸ Ira ari madan jan ni joujou o majak o peren kaualap, o tanwei kaireki on japwilim a tounpadak kan. ⁹ A ni ara kola, kaireki japwilim

a tounpadak kan, kilan, Iejuj ap tu *on* ira majani: Ran mau! Ira ap kai *on* poridi ni aluwilu a o poni i. ¹⁰ Iejuj ap kotin majani *on* ira: Der majak, kowei kaireki ri ai ol akan, pwe re en koieilan Kalilää. I waja re pan diar ia. ¹¹ Ni ara kokola, kilan jilepa kai ko don kanim o kaireki jamero lapalap akan karoj me wiauier. ¹² Irail ari pokon pena ianaki jaumaj akan o kapukapun, ap ki *on* jaunpei moni toto. ¹³ Indai *on* irail: Komail pan inda: A tounpadak kan pwarador pon pirapela i *ni* at mamair. ¹⁴ A ma kopina pan ronada duen mepukat, kit ap pan jauaja komail re a. ¹⁵ Irail ari aleer moni kan o wiadar duen me re katiti *on* irail. A kajoi pot et lolok jili ren Juj akan kokodo lel ran wet. ¹⁶ A tounpadak ekamen kowei *on* Kalilää, pon nana eu, me Iejuj kotin kakalik *on* irail er. ¹⁷ Irail lao diaradar i, re poni *on* i, a akai me peikajal. ¹⁸ Iejuj ap kotido majani *on* irail: Manaman en nanlan o jappa karoj muei *on* ia er. ¹⁹ Komail ari kola o padaki *on* toun jappa karoj o paptaij ir ala ni mar en Jam o Na o Nen jaraui. ²⁰ Padaki *on* irail, me ren dadaurata meakan, me I kakalik *on* komail er. O kilan, I pan daudaulole komail jili kokolata, lao lel jappa imwijkela.

Kadede Kap Pjam Akan
The New Testament and Psalms in the Pohnpeian
language of the Federated States of Micronesia (old
translation, using old alphabet)

Public Domain

Language: Pohnpeian

2014-11-10

PDF generated using Haiola and XeLaTeX on 11 Nov 2022 from source files
dated 30 Nov 2021

1941731f-581e-5815-a2a4-a976cf53af02